

# Araogan Ze

## Wagemeun Ze Araog Usaleun

### Agau e nugau zebigeg

Yesus go Mesgai wag simai darena, wai 65 mazicina, Zon go em tub wanib Patmos Emwaug ebu hiakaranem zau oug hina, daimai, agau go sikut weun. Duail el ag agal oiagab Yesus en petak emen go i utan gusig patai dabun aimai, sikut weun. Uwait nug wabil eiman ein igul aiu ses zumau Zon abai moroun.

Agau gonugau bigeg banou enai, aiu ses Yesus nug gonugau iwai zaugul abai, Satan nug dual mui, unum eg maramau. Duail el inen ag uhu oimai, gusig tapai damamen, aiu ses Uwait nug isanaraba, ag gonugau empip simai naliu damamen. Igul go zumau Uwait nug wabil eiman Zon abai morona, go sikut weun.

### Agau e sesamorabun ze

1:1-8 Zon nug duail el ‘Amban’ awareun.

1:9-3:22 Zon wabil eiman Kristus uligeun. Dubanou Ban nug uzan kwali (7) ebu an Kristen duail el ze palautai mareun.

4:1-8:1 Zon go wabil eiman, Dubanou Ban nug agau holinai memen waipina, uligeun.

8:2-11:19 Uwait nugau tibur agen balau kwali uebi, igul ipal beu beu usalemen.

12:1-13:18 Satan nugau ze oi awarenemen dudu aliag agen egun alaloimai, em e ebu alemen.

14:1-15:8 Zon wabil eiman igul ata atai asiu uligeun.

16:1-21 Uwait nugau tibur kwali agen tebil tutak tutak pataimai, alina, go tebil eiman uhu beu beu zomen.

17:1-20:10 Uwait nug Babilon ban uzan eg morona, Satan gonugau zaugul aliag dual ab oug hiacareun.

20:11-15 Uwait nug duail el sisiarabun ziw as nugau ze.

21:1-22:5 Zon nug Mesgai awau mui em awau mui, Uwait nugau ban uzan awau Zerusalem muzmuz damau uligeun.

22:6-21 Zon nug Yesus koli pigai alamaui aimai, awaraimai, gonugau ze poeun.

**Kristus nug ein igul aiu ses usalamaun en Zon abai moroun.**

**1** <sup>1</sup>Ze e Yesus Kristus nug Zon abai moroun. Getal ze go wageimai dareun, bo, Yesus nug ze go araog meun. Uwait nug igul go pigai usalamaun en Yesus abai morona, gonug mui gonugau salau dudu abai mareun. Yesus nug gonugau tibur palautina, gonug iz Zon, gonugau salau du, ze go abai milabun aleun. <sup>2</sup>Izan han duailel ipal ze go mui, ece unum pemin mui, awaranem. Ze e Uwait nugau ze. Uwait nug igul go wageimai dareun, Yesus Kristus abai morona, gonug unum iz ameab araog abai mileun. <sup>3</sup>Ze go eiman Uwait nug ein igul aiu ses usalamaun en aneun. Duailel ag ze go nanalaimai, ag siksikamamen. Duailel ag ze e doimai, ag Uwait nugau ze izan sikut wemin sesamoramamen, ag han siksikamamen. Einen, igul go Uwait nug usalabun aneun go petak pigai usalamau.

**Zon nug agau kwali Esia agaigan oiagab petak  
emen duailel sikut wai mareun.**

<sup>4-5</sup>Iz Zon, izan ag, Kristen duailel, Esia agaigan ban uzan kwali daremen sikut wai marem.

Uwait ulis dareu, go getal dareun, go aiu ses koli alamau. Uwait nugau wes kwali ag Uwait nugau hubabun biz ameg ebu tapai darem. Yesus Kristus go Uwait nugau ze unum naliu maraneu. Go tutak amegai noumaimai, koli ob oug eiman usai zoun. Gonug em e gumaranemen dudu banban unum gumaraimai, agal du banou usaleun. Ag guzenina, iz Uwait aurem, nug dual gonugau wes kwali abai Yesus Kristus dual agen oiagab naliu eiman ag isanarebi, agal oiagab iau damau.

Yesus nug ig en ougab nug noumaimai, gonugau eseu sil igual igul eg unum zilagai migeun. <sup>6</sup>Gonug ig unum Uwait nugau duailel abai gonugau ula dabun dudu sul tapai migeun. Ig gonugau memeg, Uwait nugau salau mai darem. Gonun, ig enanem, “Yesus Kristus go muzmuz gusig banou mui wanib wag damau. Petak.”

<sup>7</sup>Ag uligan, go pi oug eiman alamau! Duailel unum agal ameag nug pimamen. Duailel go malai sil wemen ag han ereg go pimamen. Duailel em e ebu darem, ag unum go uligaimai, banban weinamamen. Igul go petak pet zumau.

<sup>8</sup>Uwait Ban go gusig unum a, go guzenai aneu, “Iz amegai darem, iz ulis darem.” Go Uwait go sag ulis dareu, getal dareun, aiu ses go alamau.

**Zon nug Kristus peun.**

<sup>9</sup>Iz Zon, iz agal zaiag, iz ag abai ereg ig Yesus dual pezai dacanem. Iz ag abai ereg ig mu wanem. Iz han ag abai ereg ig Uwait nug gumiganeu. Iz ag abai ereg uhu oimai, oiagab selai mui dacanem. Iz Uwait nugau ze

maraimai, izal oiab Yesus nug en petak emin, guzenai ze marai darena, iz uhu milabun Patmos em waug ebu hiacaranem zau oug milemen. <sup>10</sup> Ban Zobu tub ebu, Uwait nugau Ah Wes nug iz gusig gumilina, iz wabil eiman sul, seicab eim du tub nugau zeu, balau saiu ianeu sul, gusig ulina domin. <sup>11</sup> Du go nug aileun, “Ecesab unum na uligem, agau go ebu sikut waiba, agau zikut wemen duaillel oiagab petak emen ban uzan kwali palautai maren. Epesus, Smerna, Pergamum, Taiataira, Sardis, Piladelpia, Laodisia uzan go palautai maran.”

<sup>12</sup> Guzenina, du inug iz ze aileu aimai, koli kekulemin. Iz kekulaimai, al gol kwali piaremin. <sup>13</sup> Iz go al ula ebu du tub dareun pemin. Du go gue ‘Du nugau Nag’ *Daniel 7:13* sul tapai dareun pemin. Go tibur galau huia arugaimai, gonugau arab unum kulai meun. *Let gol* tub gonugau torog ebu dareun. <sup>14</sup> Gonugau gagalig ulig ausiau go waukai ausiau nugau ulig sul, go han pi ausiau sul mui. Gonugau ameg wag go ab al ilaneu sul. <sup>15</sup> Gonugau arab go aiwag *gol* ab ebu aganem, unu tamacag, naliupet pet usalaneu sul. Iz gonugau ze meun zeu domin go ze salu nuaneru saiu sul. <sup>16</sup> Gonugau ebeg naliu eiman, ureb kwali patai dareu. Maulzag huia aig tubaim tubaim, gonugau augol eim noi dareu. Gonugau siameg am banou ula, am gusig ilaneu go sul.

<sup>17</sup> Iz go uligaimai, gonugau arab waugab alainoimai, noumemin du sul daremin. Bo, gonugau ebeg naliu eiman izal enim ebu maimai, guzenai aileun. “Na i uminen. Iz petak pet aizem, iz amegai darem, iz ulis darem. <sup>18</sup> Iz awau darem, iz getal noumemin, bo, uligilen, iz ulis awau muzmuz darem. Iz wanim mui, izan noumabun igul gumeimai, duaillel noumemen agal uzanan zau og ebuan wakum patai darem.

<sup>19</sup> Gonun, na igul e ulis zoi dareu mui, aiu ses zumau mui, uligem guzental sikut wamam. <sup>20</sup> Na ureb kwali e izal ebe naliu eiman darem mui, al *gol* kwali mui, uligarem, go ze wageimai dareu sul darem. Ureb kwali go gonugau bigeg enai: ban uzan kwali go Kristen duaillel gumarabun tibur kwali Al *gol* kwali go ban uzan kwali ebuan Kristen duaillel.”

### Yesus nug Epesus uzanan Kristen duaillel ze palautai mareun.

**2** <sup>1</sup> Du gonug kolital guzenai aileun, “Na tibur go Epesus uzanan Kristen duaillel gumarai dareu, guzenai sikut wai moramam. Iz izal ebe naliu eiman ureb kwali pataimai, iz al *gol* kwali ula ebu aidanem. Iz ze go na palautai mizemin, go aleu. <sup>2</sup> Ag, Kristen duaillel Epesus ban uzan daremen, ag salau gusig maimai, agal igul unum guzenanemen, go iz abiu. Ag gusig tapai daimai, ag dudu igul eg macanemen agal ze i sesamoranemen. Dudu go agen ag guzenai awaremen, ‘Ig han Yesus nugau ze oi aidanem dudu.’ Bo, ag Yesus nugau ze oi aidanemen dudu tam. Ag, Epesus duaillel, dudu goagal polu ze doimai, suban sisiaremenin,

agal igul guzenanemen han unum sisiaremenin. Gonun, ag abiu dudu go ag polumanemen dudu. <sup>3</sup>Bo, ag, izal ze sesamoranemen dudu, gonun, dudu ipal agen agal igul peimai, aiag sisilina, igaraimai, mu banou maraimai, igul eg maranem. Ag go enegun i uminanemen, agal salau suban gusig patai daimai, uhu go gamacanemen, go iz abiu.

<sup>4</sup>Bo, iz ulis ag abai ze gusig mui. Ag getal iz en agal oiagab nug petak pet noumemenin. Bo, ulis ag igul go guzenemenin sul guzenab tam. <sup>5</sup>Ag amegai iz en oiagab nug petak noumemenin, ag koli igul go guzenemenin dabilan. Ag amegai iz en oiagab nug noumemenin, ag go igultal guzenan. Ag agal igul eg ebuan koli kekulab tam, iz ag waiagab alaimai, al ag ebuan oi unai. <sup>6</sup>Bo, agal tutak igul go naliu. Ag Nikolas nugau duaillel agal igul eg gasag maimai, i sesamoranemen. Iz han guzentall gonugau igul gasag hiacanem.

<sup>7</sup>Duair in go dabug a, go ze go Uwait nugau Ah Wes nug oiagab petak emen duaillel awareu, go suban don. Duair in igul eg unum zilacoromau, izan go duair naliu aimai, petak awau muzmuz dabun a dab moromin, zamau. A go Uwait nugau ougem Mesgai wag dareu.

#### **Yesus nug Smerna uzanan Kristen duaillel sikut wai mareun.**

<sup>8</sup>Guzenaimai, na tibur Smerna uzanan Kristen duaillel gumarai dareu, go guzenai sikut wai moren. Du go gue amegai dareu, go ulis dareu, gonug na ze e palautai mizeu. Go noumaimai, koli usaimai, awau dareu. <sup>9</sup>Ag, Smerna Kristen duaillel, ag uhu wanemen, go iz abiu. Ag em ebuan ecesab asiu tamacag, go han iz abiu. Bo, ag Kristen duaillel, ag Uwait nugau ameg ebue ece asiu pet mui. Iz abiu dudu ipal agen agal wanimag ebue polu ze macanemen. Dudu go agen guzenai ze manem, 'Ig Zuda dudu', bo, ag petak Zuda dudu tam, ag Satan nugau salau macanemen dudu. <sup>10</sup>Uhu ipal ag ebalagab zumau, ag go en i uminan. Ag go don, Satan nug ag ulan duaillel ipal oiagab petak emen piarabun hiacaranem zau oug hiacaraba, go ebue gil houhou ag uhu asiu noumabun sul oi damamen. Agal oiagab iz en petak aimai, gusig patai damamen, betei betei ag noumamamen. Ag guzenebi, izan ag awau muzmuz dabun gusig marai. <sup>11</sup>Duair in go dabug a, go ze go Uwait nugau Ah Wes nug oiagab petak emen duaillel awareu, go suban dumam. Duair in igul eg unum zilacoromau, izan go koli noumabun ziwas ebue, ab eleu oug i palautorai."

#### **Yesus nug Pergamum uzanan Kristen duaillel ze palautai mareun.**

<sup>12</sup>Gonun, du gonug guzenai aneun, "Na tibur go Pergamum uzanan Kristen duaillel gumarai dareu go guzenai sikut wai moren. Du go gue maulzag huia aig tubaim tubaim mui patai dareu gonug na ze go palautai mizeu. <sup>13</sup>Iz nait darem uzan abiu, Satan nugau gumaraneu biz uzan go dareu. Bo, ag, Pergamum Kristen duaillel, ag izal wanim gusig pataimai,

agal oiagab iz en petak emen, go utab tam. Getal du tub gonugau wanib Antipas go izal ze duail el awaraneu, go ag abai dareun. Go izal ze suban sesamoraneu. Agal uzan, dudu ipal Satan nugau salau macanemen dudu agen go wina, noumeun. Go Satan nugau uzan. Ziwas go ebu han ag agal oiagab iz en petak emen go utab tam.

<sup>14</sup>Bo, iz ag abai ze ipal mui. Agal duail el ipal Pergamum uzan ag abai darem, ag Balam\* nugau igul gusig pataimai, sesamoi darem. Balam nug Balak\* go Israel duail el ameag patabun igul abai moroun. Balak nug Israel duail el ameag patena, goagen igul eg memen. Dudu ipal agen goagal polu uwai t wanimag ebu, egun agaimai, ulapagwag macanemen Israel duail el agen egun go oimai, zanemen. Israel duail el go ag han Balak nugau ze sesamoi mai, wal igul ipal macanemen. Uli s, agal duail el ipal han agal igul sesamoi mai, guzenanemen. <sup>15</sup>Igul go guzenanemen sul dudu ipal ag ula darem, agen Nikolas nugau ze sesamoi darem. <sup>16</sup>Ag uli s agal igul eg ebuan koli kekulan! Tam aba, izan ag waiagab alaimai, izal oisau ebu maulzag huia aig tubaim tubaim mui go sil ag abai malai manai.

<sup>17</sup>Du in go dabug a, go ze go Uwai t nugau Ah Wes nug oiagab petak emen duail el awareu, go suban dumam. Duair in go igul eg unum zilacoromau, izan ee wageimai dareu, wanib mana\*, go moromin, zimau. Aiwag ausiau han murai. Aiwag go ebu wanib awau sikut wemin dareu. Dudu ipal ag wanib go i abiu, du go aiwag umau go sag wanib abiu mamau.”

### **Yesus nug Taiataira uzanan Kristen duail el ze palautai mareun.**

<sup>18</sup>Du gonug guzenai aneun, “Kolital na Uwai t nugau tibur Taiataira uzanan Kristen duail el gumarai dareu, guzenai sikut wai moren. Ze e guzenai sikut wen, iz Uwai t nugau Nag, izal ame ab al ilaneu sul. Izal aram aiwag gol naliu ab ebu aganem sul. Iz ze go ag, Taiataira duail el, waiagab palautina, aleu. <sup>19</sup>Agal igul guzenanemen go iz unum abe mem. Iz abiu ag oiagab nug duail el en noumanemen, ag iz en oiagab petak emen, ag izal salau maimai, dudu ipal isanaranemen. Iz abiu uhu ata atai ag ebalagab zuna, ag suban gusig tapai dacanemen. Iz abiu amegai ag igul naliu memenin, uli s ag igul naliupet pet mai daremen.

<sup>20</sup>Bo, iz ag abai ze mui. Ag air Zesebel go ulagzina, go ag abai daneu. Gonug iz Uwai t nugau ze doimai, awaranem air aneu. Gonun, gonug izal duail el ze awarina, ag gonugau ze sesamoi mai, wal igul eg macanemen. Dudu ipal agen polu tibur ulapagwag marabun egun agena, ag ulacan duail el ipal agen gonugau ze sesamoi mai, egun go oi zanemen. <sup>21</sup>Izal dabeleu air go gonugau igul eg ebuan koli kekulabun iz go ziwas ipal moromin. Bo, go gonugau wal igul eg macaneu ebuan kekulab uteu.

<sup>22</sup>Guzenina, izan go ebeu moromin, go mu banou umau. Dudu go gue

dual wal igul mai darem, agal wal igul air go dual guzenanemen i utena, izan ag han go dual uhu maremin, mu banou umam. <sup>23</sup>Iz gonugau igul sesamoranemen duail el han unum wagaremin, noumamam. Guzenemin, Kristen duail el unum ag ein igul agal dabeleu mui agal oiagab oug dareu izan pianem abiu mamamen. Duail el igul eg guzenanemen, izan ag uhu marai, duail el igul naliu guzenanemen, izan ag ece naliu marai. Ag go han abiu macanemen.

<sup>24</sup>Bo, ag duail el ipal Taiataira uzan darem, ag go air nugau ze abai mareu, ag go i sesamoranemen. Ze Satan nugau ougab oug wageimai dareu, go ag abiu i memen. Ulis iz ag petak pet awarem, ag gusig tapai dabi, iz uhu ipal ag i marai. <sup>25</sup>Agal oiagab petak emen, go guzental dabi, iz koli alanai.

<sup>26</sup>Duair in go igul eg unum zilacoroimai, izal ze sesamoraneu, guzental betei betei iz alanai ziwas ebu, izan go emgasag ipal ebuan duail el gusig gumarabun salau murai. <sup>27</sup>Iz go gusig moromin, gonug duail el gumaraneun malai hog pataimai, duail el wagaraba, ag mis gugai hina, sib sib usalaneu sul guzenamamen.

*Buk Song 2:9*

Iz izal gusig izal Mekai nug iz mileun, izan mui koli du go murai. <sup>28</sup>Iz go umaseuan ureb han murai.”

<sup>29</sup>“Duair in go dabug a, go ze go Uwait nugau Ah Wes nug oiagab petak emen duail el awareu, go suban dumam.”

### **Yesus nug Sardis uzanan Kristen duail el ze palautai mareun.**

**3** <sup>1</sup>Guzenaimai, du go nug guzenai aneun, “Na tibur go Sardis uzanan Kristen duail el gumarai dareu go guzenai sikut wai moren. Du go gue Uwait nugau wes kwali mui, ureb kwali mui, patai dareu, gonug na ze palautai mizeu. Iz ag, Sardis uzanan Kristen duail el ein igul macanemen go iz abiu. Duail el ipal agen guzenai ze manem, ‘Sardis uzanan duail el awau pet darem’. Bo, tam. Ag izal ameab noumemen dudu sul. <sup>2</sup>Gonun, ag pigai asan, i gabuan. Getal ag Uwait nugau igul naliu sesamoranemenin. Ulis, ag igul go getal guzenanemenin ulis dareu unum koli gusig macan, tam aba, go unum wage mamau. Agal igul guzenanemen iz pemin go Uwait nugau ameg ebu naliu tam. <sup>3</sup>Getal dudu ipal agen Uwait nugau ze abai marena, domen. Ag ze go koli dabeleimai, suban sesamoraiban, agal igul eg ebuan kekulan. Ag igul go i guzenamamen, ag izal alabun ziwas i abiu mamamen ebu, iz ag waiagab zob du sul pigai alanai.

<sup>4</sup>Bo, Sardis uzan dudu tutak tutak agal tibur galau unu tamacag mui daremen. Ag dudu naliupet pet, gonun, ag tibur galau ausiau maimai, iz ibail aidamamen. <sup>5</sup>Gonun, duair in go igul eg unum zilacoromau, go tibur galau ausiau go sul maba, izan gonugau wanib izal awau dabun agau ebu dareu i ulusanai. Izan izal mekai mui, gonugau tibur mui, goagal ameagab ebu araog ze manai, ‘Du go izal.’

<sup>6</sup>Duair in go dabug a, go ze go Uwait nugau Ah Wes nug oiagab petak emen duailel awareu, go suban dumam.”

**Yesus nug Piladelpia uzanan Kristen duailel ze palautai mareun.**

<sup>7</sup>Guzenai, du go nug koli aneun, “Na tibur go Piladelpia uzanan Kristen duailel gumarai dareu guzenai sikut wai moren. Du go gonugau igul unum naliupet pet, gonugau ze maneu umkoskos sesamoraneu, gonug na ze e palautai mizeu. Go Devit nugau gumaraneu gusig mui. Gonug ein ece im oitaba, du tub nug koli im gebabun iborain tam. Gonug ein ece im gebaba, du tub nug koli im oitabun iborain tam.

<sup>8</sup>Iz ag Piladelpia duailel ein igul guzenanemen go iz abiu. Agal gusig ginampet, go iz abiu, bo, ag izal ze sesamoraimai, ag izal salau utab tam. Iz agal ameagab ebun im oitaieimin dareu, du tub nug go im koli gebabun iborain tam.

<sup>9</sup>Ag go don. Dudu go ag Satan nugau ug ag guzenai ze manem, ‘Ig Zuda agal ug.’ Bo, ag Zuda agal ug pet tam, ag polumanemen. Gonun, izan polumanemen dudu go gusig pataraimai, imaraimai, ag waiagab alaimai, agal ameagab ebun taubib wamam. Guzenemin, polumanemen dudu go unum iz izal oiab nug ag, izal duailel, en noumem abiu mamam.

<sup>10</sup>Ag izal ze unum sesamoraimai, uhu mu mui ata atai ag ebalagab zuna, ag uminab tam, ag gusig tapai danemen. Izan aiu ses em e ebuan duailel unum sisiarabun uhu beu beu marai. Ziwas go ebun, iz ag suban gumaremin, ag uhu go i umamen.

<sup>11</sup>Iz ag waiagab pigai alanai. Agal oiagab petak emen, go i uten, gusig patai dan. Guzenebi, du tub nug agal ece naliu Mesgai wag dareu i oi himau. <sup>12</sup>Du in go igul eg unum zilacoromau, izan go Uwait nugau Nou zau banou zaueim zau sanag sul tapai memin, go zau go koli i utei numau. Iz zau sanag go ebun, Uwait nugau wanib sikut wai memin, go ban uzan awau wanib Zerusalem han sikut wai. Go Zerusalem awau go Uwait Mesgai wag eim alamau. Iz izal wanim awau han zau sanag go ebun sikut wai.

<sup>13</sup>Duair in go dabug a, go ze go Uwait nugau Ah Wes nug oiagab petak emen duailel awareu, go suban dumam.”

**Yesus nug Laodisia uzanan Kristen duailel ze palautai mareun.**

<sup>14</sup>Guzenaimai, du go nug kolital aneun, “Na tibur go Laodisia uzanan Kristen duailel gumarai dareu guzenai sikut wai moren. Du go gue petak ze maimai, go Uwait nugau ze naliu unum suban maraneu. Go Uwait nug ece unum usalarena, zomen agal bigeg. Gonug na ze e palautai mizeu. <sup>15</sup>Ag, Laodisia uzanan duailel, ein igul guzenanemen go iz abiu. Iz abiu ag ubug pet tam, ag zabeg pet tam. Izal dabeleu enai, ag ubug pet damamen ta, zabeg pet damamen ta, go naliu. <sup>16</sup>Bo, ag zabeg

ginampet sul, ag ubug pet tam, ag zabeg pet tam, gonun, izan ag izal oisau ougeim pilikaremin, numamen. <sup>17</sup>Ag guzenai ze macanemen, ‘Ig ecesab asiu a. Ig ecesab asiu oimai, ecesab tub tamacag dab tam.’ Tam pet. Ag ecesab tamacag, izal ameab ag eg pet daremen. Ag ameag kumi dudu sul. Ag tibur galau tamacag, burum dacanem sul. Duail el ipal agen ag uligaraimai, ag en ‘Bisomagar,’ anem. Ag go i abiu ta? <sup>18</sup>Izan ag guzenai awarem, ‘Ag izal gol ab nug eleun gau mamamen. Ag guzenebi, ece asiu pet umamen. Ag burum daimai, aipag nuba, tibur galau ausiau iz e bilaban gau maimai, tugamamen. Ag marasin ipal iz e bilaban gau maimai, agal ameag ebu mebi, agal ameag koli naliu usalamau.

<sup>19</sup>Duail el inen iz ag en oiab nug noumanem, izan ag igul eg macanemen peimai, aisisilaimai, uhu maranem. Guzenemin, agal salau macanemen ebu koli zoi salau gusig mabun agal igul eg e buan koli kekulan. <sup>20</sup>Ag go don! Iz abuog ebu tapai daimai, zau im korukoruai darem. Duair in go izan zau im korukoruai darem saiu doimai, zoimai, zau im oitaba, iz go dual gonugau zaueim simai daimai, go dual ee zai, go han iz ibail ee zimau.

<sup>21</sup>Duair in go igul eg unum zilacoromau, go izal hubanemin biz ebu memin, go iz ibail duail el unum gumarabun hubamau. Getal iz han guzent al igul eg unum zilacoroimai, izal Mekai nugau biz ebu nug mui duail el gumarabun hobomin.’ <sup>22</sup>Duair in go dabug a, go ze go Uwait nugau Ah Wes nug oiagab petak emen duail el awareu, go suban dumam.

### Mesgai wag Uwait ulagwag moromen.

**4** <sup>1</sup>Iz koli uligaimai, Mesgai wagan abuog im oitai dareun pemin. Guzenemen, du gonugau zeu balau saiu sul getal domin, koli guzenai aileun, “Na wag zobenag, ein igul ai u ses zumau iz abai mizai.” <sup>2</sup>Ziwas go ebutal, Uwait nugau Ah Wes nug iz gusig gumilina, iz wabil eiman sul Mesgai wag du banou nugau hubaneu biz ebu du tub hobo i dareun pemin. <sup>3</sup>Du gonugau siameg aiwag tub baila, wanib zasp a sul mui, aiwag tub epeua, wanib konilian sul eleun. Berep tub aiwag tub karakun wanib emeral sul nug biz go talioroi dareun. <sup>4</sup>Biz go dareu waugab ipal biz 24 talioroi daremen. Go ebu dudu banban 24 go tibur galau ausiau arugaimai, *hat* gol emgasag gumanemen dudu agal sul goagal gagaliag ebu maimai, hobo i daremen. <sup>5</sup>Iz du banou gonugau biz ebu amel sul hilaina, pemin. Iz saiu asiu ban Mesgai wag em guruaneu sul domin. Du banou gonugau biz ameg ebu al kwali elei dareun. Al go Uwait nugau wes kwali. <sup>6</sup>Du banou gonugau biz amegwab ebutal e tub ibut ze iror sul pemin. Go naliupet pet, unu tamacag dareun pemin.

Ece ipal iwanarai egun sul awau daremen go du banou gonugau biz waigabtal talioroi daremen uligemin. Go tubaim tubaim zoi tapai daimai, goagal enimag ebu ameag asiu daremenin. Ameag ipal agal seiagab

daremen. <sup>7</sup>E awau amegai dareu, go egun laion sul. E tub awau dareu, go bulumakau zawai sul. E tub awau dareu ianai ainarai, go gonugau siameg du nugau sul. E tub seseim pet awau dareu, go meg bailzag banou pururai aidaneun sul. <sup>8</sup>Ece iwanarai go awau darem, go unum tutak tutak sanag wasolig a. Goagal ameag asiu enimag ebu mui, sanag ulig oug mui, unum daremenin. Go kabal i utanem, amban, umaum, go umkoskos kabal wai dacanemen. Go guzenai kabal wanem, “Uwait Ban, go gusig unum a, gonugau igul naliu, gonugau igul naliu, gonugau igul naliu. Go getal dareun, go ulis dareu, go aiu ses alamau.”

<sup>9-10</sup>Ece iwanarai go awau darem, ag du go awau muzmuz gonugau biz ebu hobi darena, ag oiagab siksikai mui, ‘Ese-e’ auremen. Goagen go al banou mui aimai, gonugau wanib wag mai daremen. Ece iwanarai go ag go guzenina, dudu banban 24 agen Uwait nug go muzmuz daneu gonugau biz ebu hobi darena, ag go waugab taubib waimai, ulagwag muranem. Go goagal *hat* gol go amegwab oi heimai, guzenai ze macanemen,

<sup>11</sup>“Uwait, na igual Du Ban, na tutak na wag darem. Na naliupet pet, gonun, duail el go na banou aimai, nait wanim ulapwag mizeimai, nait gusig piu damam. Einen, na ece unum usalaremen. Ecesab go nagtal nait dabeleu eim usalaremen, gonun, ecesab go unum zomen, ulis darem.”

#### **Zon nug agau tub holinai memen uligeun.**

**5** <sup>1</sup>Uwait nug gonugau biz ebu hobi daimai, agau tub gonugau ebeg naliu eim patai dareun pemin. Agau go agau huia tubaim tubaim sikut wai maimai, holinai memen. Agau go sisiu dab agas sul kwali egeimai, gusig pezai memen.

<sup>2</sup>Iz Uwait nugau tibur tub gusig mui nug guzenai gusig ul eun domin, “Du in go igul naliupet pet macaneu, gonun, sisiu dab agas sul agau e ebu darem zilagaimai, agau apeg mui ulagamau?” <sup>3</sup>Bo, duair tub go Mesgai wag dareu ta, em ebu dareu ta, noumemen dudu agal uzan dareu ta, go agau go apeg a ulagabun iborain tam. Du tub ein ze agau go oug dareu piabun iborain tam. <sup>4</sup>Iz du tub nug agau go ulagaicina, piab tam, gonun, iz, go en banban weinemin. <sup>5</sup>Ziwas go ebu, du banou tub nug iz guzenai aileun, “Na i weinen. Na go don, go egun laion, go Zuda\* agal ug ebuan, go Devit nugau embigeg, nug gusig maimai, gonugau iwai zaugul unum zilacareun, gonug petak go sisiu dab agas sul kwali zilagaimai, agau apeg a ulagamau.”

<sup>6</sup>Guzenai ailina, iz Sipsip Nag tub go Uwait Ban nugau biz amegwab tapai dareun pemin. Go ece iwanarai awau darem mui dudu banban go 24 mui agen go talioroi katai daremen uligemin. Go Sipsip Nag go getal wina, noumeun sul. Gonugau gagalig ebu malai kwali mui, ameg kwali mui, go Uwait nugau wes kwali Uwait nug palautarena, em e ebu emgasag unum alemen. <sup>7</sup>Go Sipsip Nag nug beteimai, Uwait nug nugau

biz ebu hoboimai, agau go apeg mui ebeg naliu eim patai dareun ebuan  
oun. <sup>8</sup>Go guzenina, ece iwanarai go awau darem mui, dudu banban  
24 mui, go Sipsip Nag waugab alaimai, taubib wemen. Dudu banban  
go ag tutak tutak wag mui, tebil gol mui, patai daremen. Go tebil oug  
garai sous naliu a, garai go gonugau duail el agen Uwait nug auranem  
ze gonugau dorog sul. <sup>9</sup>Go kabal awau guzenai wemen, “Na agau go  
apeg a sisiu dab agas sul sil pezai memen, go oi ulagabun iboin. Einen,  
dudu agen na niwena, noumemen, nait esep nug duail el ug beu beu  
mui, emgasag beu beu ebuan mui, enimag beu beu mui, agal ze beu beu  
mui, unum gau maraimai, oi Uwait moromen. <sup>10</sup>Nagen duail el go unum  
gotularaimai, ag Uwait gonugau duail el pet mui, gonugau ula dacanemen  
duail el mui usalaremen, goagen han em e ebu duail el ipal gumaramam.”

<sup>11</sup>Iz koli pemin, Uwait nugau tibur asiu asiu pet agal zepag domin. Goagal  
ianai asiu, handret milion sul. Ag Uwait Ban nugau biz mui, ece iwanarai  
go awau darem mui, dudu banban mui, unum goagen talioroi katarai  
daremen. <sup>12</sup>Guzenaimai, goagen kabal wina, kabal saiu banban guzenai  
iboreun, “E Sipsip Nag getal duail el agen go wina, noumeun. Gonugau gusig  
nug noumabun igul zilacoroun, gonun, go wanib banou mui, ece naliu mui,  
dabeleu naliu mui, gusig unum wabun iboin. Go naliupet pet, gonun, duail el  
agen gonugau wanib ulagwag maimai, go en oiagab siksikaimai, ‘Ese-e’  
auranem.” <sup>13</sup>Ece unum Uwait nug usalareun awau dacanemen agen ze mina,  
iz domin. Ece go unum Mesgai wag darem, em ebu darem, noumemen dudu  
agal uzan darem, ibut ze oug darem, ag unum guzenai kabal wemenin,  
“Uwait go gumaraneu du banou nugau biz ebu hobo dareu mui, Sipsip  
Nag mui, go nag dual naliupet pet, gonun, ig goagal wanimag ulapagwag  
maraimai, go en oigeb siksikaimai, ‘Ese-e’ awaremun, go muzmuz gusig  
damam.” <sup>14</sup>Go ece iwanarai awau darem agen enemen, “Petak!” Guzenina,  
dudu banban agen taubib waimai, goagal wanimag wag maremen.

**Sipsip Nag nug sisiu dab agas sul was olig agau ebuan zilagai eun.**

**6** <sup>1</sup>Guzenaimai, iz Sipsip Nag nug sisiu dab agas sul amegai kwali mui  
dareun, zilagai eun pemin. Gonun, ece iwanarai awau darem tub  
nug gonugau ze meun saiu em guruanu sul domin. Go guzenai aneun,  
“Alen!” <sup>2</sup>Iz koli ameitaimai, *hos* ausiau tub pemin. *Hos* go ebu du tub  
go kem patai darena, tibur tub nug go du banou nugau *hat* moroun. Go  
malai zilarabun du nug sul gonugau iwai zaugul unum zilarabun beteun.

<sup>3</sup>Kolital Sipsip Nag go sisiu dab agas sul tub agau pezai dareun ebuan  
zilagai eun. Guzenina, e tub awau dareu ianai aliag nug alaimai, guzenai  
aneun, “Alen!” <sup>4</sup>Guzenai ze mina, *hos* tub zoun go epeua. Tibur tub go  
*hos* atag du go malai mabun maulzag huia moroun. Go han em e ebuan  
duail el agal oiagab iau dacanemen igul oi hiabun gusig moroun. Go  
guzenina, duail el ag agzozou alalaimai, ipal ugarina, noumemenin.

<sup>5</sup> Guzenaimai, Sipsip Nag nug koli sisiu dab agas sul ianai ainarai nug agau pezai memen zilagai eun. Guzenina, e go awau dareu ianai ainarai nug guzenai aneun, “Alen!” Guzenai anena, iz *hos* tub mutuanau dareu pemin. *Hos* go atag du go ece nugau uhu piarabun *skel* ebeg sil patai dareun. <sup>6</sup> Iz du tub nugau zeu sul ece iwanarai mui awau darem go ula ebuan guzenai saipag zoun domin. Go *hos* atag du guzenai aureun, “Na bete, em ebuan ee unum eg memen, duaillel we ugaramau. Guzenemen, ag wit mis ginampet oug dareu gau mabun, salau macanemen gil tutak ebuan aiwag oimai, gau mamamen. Ag *bali* mis ainarai dareu gau mabun aiwag go sil gau mamamen. Bo, na a tub wanib *Olib* nugau a ilau mui, wain ze mui, i eg wenen.”

<sup>7</sup> Guzenaimai, Sipsip Nag nug sisiu dab agas sul ianai iwanarai nug agau pezai memen zilagai eun. Guzenina, iz koli ece awau dareu ianai iwanarai nugau zeu domin. Gonug guzenai aneun, “Alen!” <sup>8</sup> Iz koli ameitaimai, *hos* tub baila sul pemin. *Hos* go atag du gonug Noumanem wanib patai dareu. Du tub gonugau wanib Noumanemen-Dudu-Agal-Uzan go zaug seugab go *hos* ebu hobo dareun. Tibur tub nug zaug dual gusig marena, zaug dual em ebuan duaillel unum tatau iwanarai mui doun maraimai, tatau tub iwanarai ebuan duaillel unum noumamam. Go maulzag uiaban sil mui, we banou sil mui, ebeu eg ata atai sil mui, gaian egun asiu sil mui, ugarebi, noumamam.

<sup>9</sup> Sipsip Nag nug sisiu dab agas sul ianai tabkuai agau ebu pezai memen zilagai eun. Guzenina, iz ameitaimai, duaillel ipal agal doropag Uwait nugau wanib wag macanemen biz piu daremen uligaremin. Duaillel go ag getal Uwait nugau ze gusig pataimai, duaillel ipal ze go en awarenemen. Guzenina, duaillel ipal agen go ugarina, noumemen. <sup>10</sup> Doropag go agen guzenai gusig ul wemen, “Uwait Ban, nait igul unum naliu na petak ze manem. Ziwas eisasab ig gumei damun, na duaillel em ebu darem, agen ig igwemen sisiaraimai, uhu maramam?” <sup>11</sup> Salau tibur agen duaillel go tutak tutak tibur galau ausiau huia ata atai maraimai, guzenai awaremen, “Ag ziwas huia koli dabi, ag guzenaremen sul agal salau zaiagar mui, agal zaiagar ipal mui, ugarebi, ianai go Uwait nug tapai meun, betei iboraba, agal uhu koli ameg go ebu petak zumau.”

<sup>12</sup> Guzenaimai, Sipsip Nag nug sisiu dab agas sul ianai wasolig agau ebu pezai memen zilagai eun. Iz ameitaimai, em ebu mim banou zoimai, am kekulaimai, tibur galau mutuanau sul usaleun. Geil han go unum kekulaimai, epeu eseu sul usaleun pemin. <sup>13</sup> Ureb emes wagan go zaur useg epeu wol banou nug zoimai, patena, awau atelarai nuaneu sul, go unum em ebu alemen. <sup>14</sup> Emes han go ninanem biz holinai memen sul guzeneun. Guzenina, em tabag mui, em waug mui, go unum goagal empip utei wanemen. <sup>15</sup> Gonun, em e ebuan gumaranemen dudu banban mui, duaillel gumaranemen dudu mui, malai dudu gumaranemen dudu

banban mui, duail el go ecesab asiu a mui, dudu gusig a mui, salau duail el (slev) mui, duail el agal salau agtal gumanemen mui, go unum uminaimai, betei em tabag aizau ob oug wageimai daremen. <sup>16</sup>Gonun, agen em tabag mui, aiwag mui, guzenai ularemen, “Agen noiban, ig unum kuligen. Agen ig wagemigeiman, einen, du go gue gonugau gumaraneu biz ebu hobo dareu gonug ig uligigamau. Go Sipsip Nag go ig en aigsisilaimai, uhu migamoroi. <sup>17</sup>Go einen, goagal aicagsisileun uhu migabun ziwas banou ulis zou. Duair tub uhu banou go zilacoroimai, naliu dabun iborain tam.”

#### 144,000 Israel duail el Uwait nugau e bol omen.

**7** <sup>1</sup>Ece go unum peimai, iz koli Uwait nugau tibur iwanarai ag em ebu em guru iwanarai tubaim tubaim tapai daimai, wol iwanarai gusig patai daremen uligaremin. Ag go guzenina, wol goagen em ebu ta, ibut ze ebu ta, a ebu ta, wol zuabun iborain tam. <sup>2-3</sup>Iz koli Uwait nugau tibur tub am zuaneun ebuan, Uwait awau muzmuz daneu nugau bol waneun e Uwait nugau sikut mui oiagab petak emen duail el ebalagab mabun oi zoun, pemin. Gonug Uwait nugau tibur iwanarai Uwait nug agen em mui, ibut ze mui, eg marabun, gusig mareun. Gonug guzenai gusig ze ulareun, “Ag pigai em mui, ibut ze mui, a mui i eg maran. Bo, ig Uwait nugau salau dudu agal aipag ebu sikut tub wai maremin, go petak ag ece unum go eg maran.” <sup>4</sup>Agen guzenai ze memen, domin, “Go Uwait nugau duail el sikut go wai maremenin goagal ianai 144,000. Duail el go Israel agal ug begurug ebuan. <sup>5-8</sup>Duail el go Uwait nug ug tutak tutak, tausen begurug, tausen begurug guzenai tapai marena, ag sikut go omenin.

Zuda nugau ug tausen begurug (12,000),

Ruben nugau ug tausen begurug,

Gat nugau ug tausen begurug,

Asa nugau ug tausen begurug,

Naptali nugau ug tausen begurug,

Manase nugau ug tausen begurug,

Simeon nugau ug tausen begurug,

Liwai nugau ug tausen begurug,

Isakar nugau ug tausen begurug,

Sebulun nugau ug tausen begurug,

Zosep nugau ug tausen begurug,

Benzamin nugau ug tausen begurug.

Israel duail el go ug begurug go ebuan Uwait nug tapai marena, go Uwait nugau sikut omenin.”

#### Duail el asiu pet go Uwait wanib ulagwag moromenin.

<sup>9</sup>Go uligaimai, iz koli ameitaimai, duail el asiu pet uligaremin. Du tub nug duail el go nanalabun iborain tam. Duail el go unum enimag beu beu

ebuan, ug beu beu ebuan, emgasag beu beu ebuan, ze beu beu ebuan. Ag tibur galau ausiau huia arugaimai, gom gau sul patai daimai, go alai Uwait nugau biz mui, Sipsip Nag mui goagal ameagab tapai daremen. <sup>10</sup>Agen guzenai gusig ze memen, “Iguai Uwait biz ebuhoboi dareu, go Sipsip Nag dual goagen ig koli imaigemen.” <sup>11</sup>Uwait nugau tibur agen dudu banban mui, ece iwanarai awau darem mui, Uwait nugau biz talioroi kataraimai, tapai daremen, go unum Uwait nugau biz waugab taubibaimai, Uwait ulagwag moromen. <sup>12</sup>Go guzenai ze memen, “Petak, iguai Uwait go naliupet pet, gonun, ig go en oigeb siksikaimai, go du banou abiu maimai, ig go dabeleu naliu wabun aimai ananem. Ig go ‘Ese-e’ auraimai, gonugau wanib ulagwag manem. Go wanib banou mui, gusig mui daimai, muzmuz damau. Petak.”

<sup>13</sup>Gonun, dudu banban ulacan du tub nug iz guzenai kanabileun, “Duailen go tibur galau ausiau huia arugaimai, darem, go inen? Go eru eiman alemenin?”

<sup>14</sup>Iz koli go guzenai auremin, “Du banou, nagtal na abiu. Na iz ailen.” Gonug iz koli guzenai aileun, “Duailen go agal iwai zaiagar agen uhu maraimai, mu banou marena, go gusig tapai danemen. Ag agal tibur galau huia go Sipsip Nag nugau eseu sil ulusemen, gonun, agal tibur galau ausiau pet usaleun.

<sup>15</sup>Guzenaimai, go Uwait nugau biz ameg ebuhoboi waugab tapai daimai, amban umaum Uwait nugau zaueim go muzmuz gonugau salau muranemen. Uwait go gonugau biz ebuhoboi daimai, go nugtal duailen go suban isanaraimai, gumaramau. <sup>16</sup>Duailen go ag koli we i ugaramau, ag koli ze i useg ugaramau. Am wes nug agal enimag i agaramau. Ece zabeg ipal agen han agal enimag i agaramau. Tam pet tam. <sup>17</sup>Sipsip Nag go biz ula hoboi daimai, go agal gumarabun du damau. Gonug duailen go muzmuz awau dabun ze kom ebuhoboi imarai bitaba, ze zimam. Gonug guzenaba, Uwait nug goagal ameag ilau unum gulesai maramau.”

**Sipsip Nag nug sisiau dab agas sul ianai kwali agau ebuan zilagai eun.**

**8** <sup>1</sup>Sipsip Nag nug sisiau dab agas sul ianai kwali nug agau pezai memen zilagina, Mesgai wag saiu tamacag ziwah huia ginam aua tatau sul dareun. <sup>2</sup>Go mazicina, iz Uwait nugau tibur kwali go Uwait nugau amegwab tapai darena, gonug go balau kwali marena, uligaremin.

<sup>3</sup>Uwait nugau tibur tub nug tebil gol patai zoimai, Uwait nug ulagwag muranemen biz waugab tapai dareun. Ag go garai sous naliu zuaneu asiu morona, gonug garai go agaimai, Uwait nugau duailen agen Uwait nug auranemen ze mui, tulai maimai, Uwait nug ulagwag muranemen biz gol gumaraneu du nugau hubaneu biz amegwab tapai dareu ebuhoboi meun. <sup>4</sup>Go garai nugau abmuk sous naliu mui, Uwait nugau duailen agal auranemen ze mui, tibur gonugau ebeg eiman uteimai, Uwait nugau amegwab sieun.

<sup>5</sup>Go guzenina, tibur gonug Uwait nug ulagwag muranemen biz ebuan ab ameg oimai, tebil ebu maimai, oi em e ebu hamacendai, aleun. Go gue guzenina, amelaimai, emes kulalaimai, saiu banou zuna, mim banou zoun.

**Uwait nugau tibur iwanarai agen goagal balau huemen.**

<sup>6</sup>Guzenaimai, tibur kwali goagen agal balau kwali pataimai, huabun guzenemen. <sup>7</sup>Amegai tibur ianai tutak nug gonugau balau hueun. Go guzenina, ze wag gusig mui, ab mui, eseu mui, ipulaimai, em ebu aleun. Ag em unum ainarai doun maimai, a han ainarai doun maremen. Ab gonug noimai, em mui, a mui, ainarai ebuan tutak unum eleun. Gig awau han mui unum ab nug eleun.

<sup>8</sup>Guzenina, tibur ianai aliag nug gonugau balau hueun. Go guzenina, ag etub em tabag sul ab eleun mui ibut ze ebu hamacina, noi beteun. Go ibut ze ainarai doun maimai, ainarai ebuan doun tutak go eseu kekuleun. <sup>9</sup>Go ibut ze ebu ece awau dacanemen ainarai doun maimai, ainarai ebuan doun tutak go unum noumemen. Go ibut ze ebu, tebil han guzental ainarai doun maimai, ainarai ebuan doun tutak go unum tamemen.

<sup>10</sup>Tibur ianai ainarai nug gonugau balau huena, ureb banou, al banou sul eleimai, emes wag eiman alai aleun. Ag ze banou mui, ze naug ginaginam mui, ainarai doun maimai, go ureb ze ainarai ebuan doun tutak ebu noun. <sup>11</sup>Go ureb gonugau wanib ‘Munug pet’. Go ainarai ebuan ze doun tutak munug pet usaleun, gonun, duaillel asiu go ze go zaimai, noumemen.

<sup>12</sup>Tibur ianai iwanarai nug gonugau balau huendai, am, geil, ureb mui unum tutak tutak ainarai doun maimai, ainarai ebuan doun tutak eg maremenin. Am nugau ainarai ebuan doun tutak gonugau hilanau eg wemen. Geil nugau ainarai ebuan doun tutak gonugau hilanau eg wemen. Ureb han guzental guzenemen. Guzenaimai, umaum amban, agal hilanau naliu ilab tam.

<sup>13</sup>Gonun, iz ameitaimai, bailzag tub emes wag pururai aidareun pemin. Iz domin go guzenai gusig uleun, “Bisomagar, Bisomagar, Bisomagar pet. Uwait nugau tibur ainarai ipal agen goagal balau huebi, uhu banou pet em ebuan duaillel ebalagab zumau.”

**9** <sup>1</sup>Go guzenai aurina, tibur ianai tabkuai nug gonugau balau hueun. Guzenina, iz ureb tub emes wagan em ebu alina pemin. Guzenaimai, ag go ob ula oug noi beteun gonugau bigeg tamacag, go ebuan wakum moromenin. <sup>2</sup>Ureb gonug go ob ebuan og im oitina, go ob oug eiman abmuk ab banou ilaneu nugau abmuk sul zoun. Go abmuk ob oug eiman zoimai, am mui emes mui unum kulai mina, em umuteun. <sup>3</sup>Guzenina, abmuk go ougeiman ta asiu zoimai, em ebu

alemen. Tibur agen ta tatagai inain goagal gusig maremen. <sup>4</sup>Uwait nug ta go guzenai awareun, “Ag gig ta, a ta, a ginampet ipal i eg maran. Bo, ag duail el Uwait nugau bol goagal aipag ebu marab tam, go sag petak eg maramamen. <sup>5</sup>Ag duail el go mu tutak tutak marebi, geil tabkuai damam. Bo, ag ugarebi, unum i noumamam.” Ag mu go maramamen, go tatagai agen kaluaraneu sul. <sup>6</sup>Go geil tabkuai ebu, duail el go mu oimai, noumabun abu itanamam, bo, go abu go i pimam. Duail el go ag noumabun dabilanemen, bo, noumabun abu go agal ameag ebu wagemamau.

<sup>7</sup>Iz ta go go *hos* sul malai mabun daremen uligaremin. Goagal gagaliag ebu gumaranemen dudu king agal *hat* gol sul mui daremen. Goagal siamenag go dudu agal siamenag sul. <sup>8</sup>Goagal gagaliag ulig huia ailel agal gagaliag ulig sul. Goagal aiag go laion agal aiag sul. <sup>9</sup>Goagal toronag ebu go malai ebuan tibur galau *ain bras* sul. Goagal sanag ulig saiu aneun go *hos* inain agen malai ebu unabun *karis* keuina, saiu zuaneun sul zoun. <sup>10</sup>Ta go uzaiag mui. Agal uzaiag go tatagai inain agal uzaiag sul. Agal gusig go uzaiag ebu dareu, go sil duail el eg marebi, betei geil tabkuai dacanemen. <sup>11</sup>Go agal gumaraneu du banou go nug go gumaraneu, go Satan nugau tibur tub nug go ob ula oug noi beteun gonugau bigeg tamacag gumaneu. Hibru ze eim gonugau wanib Abadon anem. Bo, Grik ze eim gonugau wanib Apolion. Wanib gonugau bigeg enai, ‘Go ece unum eg maraneu du.’

<sup>12</sup>Amegai uhu banban zomen go maziemen. Bo, go don, uhu banban aliag dareu, go aiu ses zumau.

<sup>13</sup>Gonun, tibur ianai was olig nug gonugau balau hueun. Iz go ulagwag muranemen biz gol Uwait nugau ameg ebu dareu gonugau guru iwanarai ebuan, gagaliag ebuan malai iwanarai daremen eiman du tub nugau zeu sul aurina, domin. <sup>14</sup>Gonug tibur ianai wasolig gonugau balau patai dareu guzenai aureun, “Na tibur iwanarai go ag Iupretis Ze banou waugab hiacaranem zau oug hiacaremin darem, oi haremen, duail el ugarabun unamam.” <sup>15</sup>Gonun, du go nug tibur iwanarai hiacaranem zauan utarina, nomen. Gil go, geil go, wai go, ebutal, tibur iwanarai go agen em ebuan duail el unum ainarai doun maraimai, doun ainarai ebuan tutak ugarebi, noumabun hiacaranem zau oug, gumei daremen. <sup>16</sup>Agal malai dudu *hos* mui agal ianai iz guzenai anendai domin. Agal ianai aliag handret milion. <sup>17</sup>Iz *hos* go wabil eiman sul uligaremin. Dudu *hos* wag daremen agal toronag ebu tibur galau epeua ab sul, mui inu emes sul mui, baila salpa sul mui. *Hos* inain goagal gagaliag *laion* agal gagaliag sul, agal oiagsau eiman ab mui, abmuk mui, aiwag zabeg tub elaneu wanib salpa nuanemen. <sup>18</sup>Ag duail el ainarai doun maraimai, doun ainarai ebuan tutak ab go mui, abmuk mui, aiwag salpa mui, *hos* agal oiagsau eiman alaimai, unum ugarai hemen. <sup>19</sup>Einen, *hos* goagal gusig

go agal oiagsau mui, uzaiag ebu mui, dareu. Goagal uzaiag man agal gagaliag sul go sil duail el ugaremenin.

<sup>20</sup>Duail el ipal ag uhu gonug ugarina, noumab tam, ag ecesab agagal ebeag sil patai maimai, ulapagwag maranemen go uteimai, koli agal oiagab kekulab tam. Ag agal igul sesamoraimai, wes eg ta, polu tibur ta, ipal doropag *gol, silva*, aiwag, *ain bras*, a tatau sil patai maimai, ag ulapagwag maranemen. Ecesab go patai macanemen ag ece picabun iborain tam, ag ze duabun iborain tam, ag aidabun iborain tam, bo, ag ece go ulapagwag maranemen. <sup>21</sup>Ag duail el ipal ugarina, noumanemen, ag eten ze eim duail el ipal eg maranemen, ag wal igul macanemen, ag ecesab zob wanemen, bo, ag igul go uteimai, agal oiagab kekulab tam.

**Uwait nugau tibur nug agau ginampet holinai memen patai aleun.**

**10** <sup>1</sup>Guzenaimai, iz koli Uwait nugau tibur tub gusig banou mui Mesgai wag eiman aleun pemin. Go pi oug kulai mina, berep nug gonugau tabaugwab dareun. Gonugau siameg go am ilaneu sul, gonugau arab aliag go a kom ab ilaneu sul. <sup>2</sup>Tibur go gonugau ebeg sil agau ginampet tub holinai memen waipeun patai dareun. Go gonugau arab naliu eiman ibut ze ebu maimai, tapai dareun. Arab nanai eiman go em ebu meun. <sup>3</sup>Guzenaimai, go gusig uleun, gonugau ul laion nug ulaneu sul. Go guzenai ulina, em guruaneu kwali agen koli og patemen. <sup>4</sup>Go ze mina, iz go zemenar ze sikut waimoroi guzenemin, bo, Mesgai wag eim zeu tub nug iz guzenai aileun domin. “Ze go em guruaneu kwali agen zemenar, na wagemen. I sikut wen.”

<sup>5</sup>Guzenaimai, tibur go go ibut ze mui, em ebu mui, tapai dareun, gonugau ebeg naliu eiman Mesgai wag mina, pemin. <sup>6-7</sup>Go Uwait muzmuz daneu nugau wanib pataimai, gonugau ze gusig meun. Uwait nug emes mui, ibut ze mui, em mui, ece unum dareu usalareun. Tibur gonug guzenai aneun, “Uwait koli ban i gumaramau, bo, Uwait nugau tibur ianai kwali nug gonugau balau huendai, Uwait nug gonugau ze wageimai meun araog mamau. Ze go getal gonug gonugau ze doimai, aidanemen dudu awareun. Gonug ein guzenabun awareun guzenaital guzenamau.”

<sup>8</sup>Koli Mesgai wag eim iz du go nug guzenai aileun domin, “Na agau go holinai memen waitulemen, go tibur go ibut ze mui, em ebu mui, tapai dareu ebeg ebuan betei onen.”

<sup>9</sup>Gonun, iz go waugab beteimai, agau ginampet go apeg mui milen aimai auremin. Gonug iz koli guzenai aileun, “Na agau e oiba, zen. Na zemen, agau gonug nait ounab mu mizamau, bo, nait onsau ebu kel guap ze ilau zanem sul.”

<sup>10</sup>Go guzenai ailina, izan gonugau ebeg ebuan agau ginampet apeg mui oimai, zemin. Izal oisau ebu guap ze ilau zanem kel sul usaleun,

bo, dai dai, izal oiab oug munug usalaimai, solizeun. <sup>11</sup> Guzenaimai, go iz guzenai aileun, “Na koli Uwait nugau ze doimai, awaranem du sul na duailen enimag beu beu mui, emgasag beu beu mui, ze beu beu mui, gumaranemenin dudu banban beu beu mui unum betei izal ze awaren.”

**Uwait nug gonugau ze maranemen dudu aliag palautareun.**

**11** <sup>1</sup> Guzenaimai, Uwait nug iz atatau *rula* sul mileimai, guzenai aileun, “Na betei, Uwait nugau ecesab muranemen zau banou, wanib tempel mui, gonugau ulagwag muranem biz mui, goagal huia nanalai pen. Duailen eisasab ag zaueim go Uwait ulagwag muranemen agal ianai han nanalen. <sup>2</sup> Bo, na go zobu zau banou seseim i nanalen, einen, iz empip go emgasag ipal ebuan duailen, go Zuda duailen tam, maremin. Duailen go agen ban uzan naliu go tapai ai betei, geil 42 mui utamamen. <sup>3</sup> Izan izal ze maranemen dudu aliag izal ze duailen go awarabun gusig maraimai, palautaremin, alamam. Ag oiagab bisomag mui abai marabun tibur galau tugaimai, izal ze duailen go marai, betei gil 1,260 utamamen.”

<sup>4</sup> Du aliag go a wanib ‘olib’ aliag mui, al aliag go Uwait em gonugau gumanau du banou nugau ameg ebu tapai dacanemen sul tapai darem. <sup>5</sup> Bo, duailen inen agen go eg marab aimai guzenebi, ab goagal oiagsau eiman alaimai, goagal iwai zaiagar unum ab nug ilaramau. Gonun, duailen go eg marab aimai dabilemam, go igul go eiman noumamam. <sup>6</sup> Du aliag go gusig mui, gonun, go Uwait nugau ze duailen marai daimai, go emes aurebi, ze i numau. Go goagal gusig sil em ebuan ze awarebi, ze eseu alalumam. Go em webi, uhu beu beu duailen eg marabun zumau. Igul go guzenabun goagal dabeleu eiman guzenamam.

<sup>7</sup> Go Uwait nugau ze duailen marai poina, egun zag go ob bigeg tamacag oug dareu, go ougeim zoimai, go abai alalamau. Gonug dudu aliag go wagenau, noumamen. <sup>8</sup> Goagal enimag ban uzanan abu ebu gabuarai mamam. Ban uzan go gonugau wanib tatau ze eiman guzenai ze manem ‘Sodom mui, Izip mui.’ Ban uzan go getal goagal Dubanou Ban a gegeulanau ebu wina, noumeun. <sup>9</sup> Duailen emgasag unum beu beu ebuan mui, ug beu beu ebuan mui, ze beu beu ebuan mui, enimag beu beu mui, goagen du aliag go goagal enimag gil ainarai uteimai, betei gil iwanarai am ban ula ebu alai piarai damam. Ag dudu ipal utarebi, goagen goagal enimag ob i hiacaramam. <sup>10</sup> Go em ebuan duailen goagal oiagab naliu usalamam, einen, du aliag go noumamen. Go ee ban agaimai, agal ecesab, ee agzozou maramam. Einen, Uwait nugau ze maranemen du aliag goagen uhu banou duailen maranemen.

<sup>11</sup> Gil ainarai go maziaba, betei gil iwanarai am ban ula ebu, Uwait nug gonugau awau dabun wes du aliag go maraba, go awau usamam. Duailen ipal unum uligaraimai, go banban uminamam. <sup>12</sup> Uwait nugau ze

maranemen du aliag go, go Mesgai wag eiman ze tub guzenai maramam dumamen, “Ag wag zon.” Gonun, agal iwai zaiagar piarai dabi dabi, go pi oug Mesgai wag simamen. <sup>13</sup>Ziwas go ebutal, mim banou zumau. Ban uzan go houhou doun maimai, doun houhou tutak sag eg maramau. Duailel tausen kwali unum noumamam. Duailel ipal noumab tam, go unum banban uminimai, Uwait Mesgai wag dareu gonugau wanib ulagwag muramam.

<sup>14</sup>Uhu banou ianai aliag go maziceun. Bo, uhu banou tub ianai ainarai go ban i damau, go pigai zumau.

**Uwait nugau tibur ianai kwali nug gonugau balau hueun.**

<sup>15</sup>Tibur ianai kwali nug gonugau balau huena, iz domin. Zepag ipal Mesgai wag eim guzenai gusig ulemen, “Uwait Dubanou Ban mui Kristus go du gonug gonugau duailel koli imarabun tapai moroun dual, go em e unum gumabun gusig mui. Go goagal duailel muzmuz gumaramam.”

<sup>16</sup>Gonun, dudu banban 24 go goagal biz ebu hoboimai, Uwait amegwab daimai, go taubib waimai, go ulagwag moromen. <sup>17-18</sup>Goagen guzenai ze memen, “Uwait Ban, na gusig banou unum a, na ulis darem, getal daremen. Na nait gusig banou oimai, em ebuan gumabun du banou zoimai darem. Guzenaimai, ig na ‘Ese-e’ aizem. Emgasag ipal ebuan duailel go nait ze i sesamoranem, go na en aiag sisilai darem. Bo, ulis nait ainsisilabun ziwas zoi dareu, na duailel noumemen sisiamam. Ulis, nait salau duailel mui, nait ze doimai, awarenemen dudu abai, nait duailel unum ece naliu maramam. Na duailel unum nait wanim ulapwag macanemen, go dudu wanimag a mui, wanimag tamacag mui, unum ece naliu maramam. Ulis duailel inen agen em e ebu eg memen, nagen han eg maramam.”

<sup>19</sup>Go guzenai ze mina, tibur agen Uwait nugau zau banou Mesgai wag dareu im oitai darena, Uwait nugau baib bogis\* zaeim dareu araog zoun. Guzenaimai, tutak ziwas ebutal, Mesgai wag eiman amilaimai, em guruaimai, emes kulalaimai, mim banou zoimai, ze dab banban noun.

**Zon nug air mui, wazib banou mui piareun.**

**12** <sup>1</sup>Igul banou tub atai Mesgai ebu zoun. Go air tub go am tibur galau sul tugaimai, zoimai dareun. Geil gonugau arab piu dareun. Ureb begurug gonugau gagalg ebu *hat* sul meun. <sup>2</sup>Air go enib a, go mogoi soligwabun mu banou oun. Mogoi go soligwabun aimai, mu banou oimai, gusig pieceun.

<sup>3</sup>Guzenina, e atai tub ig igul awau abai migabun Mesgai wag eim zoun. Go wazib tub epeua banou pet. Gonugau gagalg kwali. Gonugau gagaliag ebuan malai houhou. Go gagaliag tutak tutak ebu gumaraneu du banou nugau *hat* sul daremen. <sup>4</sup>Go ureb emes wag darem unum ainarai doun

mizanaraimai, ainarai ebuan doun tutak gonugau uzag nug oi hiacarina, em ebu nomen. Guzenaimai, nug air go nag soligwabun ina, oi zabun aimai, air go ameg wab tapai daimai, gumei dareun. <sup>5</sup>Air gonugau nag Uwait nug go gumaraneu du nugau malai hog pataimai, duail el unum em ebu gusig gumarabun tapai moroun. Air go nag soligwina, tibur tub nug mogoi go pigai kutai oimai, Uwait nug gonugau biz ebu hobo i dareun ebu imai sieun.

<sup>6</sup>Guzenina, air go du tamacag uzan em ula ebu uminai beteun. Uwait nug getal empip go dabun tapai moroun. Go betei, empip go darena, tibur agen go gil 1,260 ee moroimai, gumei daremen.

<sup>7-8</sup>Guzenaimai, ulis Mesgai wag malai banou aseun. Maikel\* gonugau tibur abai agen Satan nug dual malai memen. Satan gonugau tibur abai go koli go abai malai memen. Bo, Satan go gonugau tibur abai go malai mabun gusig tamacag, gonun, go Mesgai wag dabun iborain tam. <sup>9</sup>Uwait nugau tibur goagen wazib banou go oi hina, em ebu aleun. Wazib go getal man eg anemen. Gonugau wanib tub Satan anem. Du go nug em ebuan duail el unum polumaraneu. Go gonugau tibur abai ereg oi hiacarina, em ebu alemen.

<sup>10</sup>Guzenina, iz Mesgai wag eiman du tub nugau zeu guzenai gusig aneun, domin, “Ulis, Uwait nug gonugau duail el koli imareu. Ulis, Uwait nugau gusig araog zou. Go gumaraneu du banou sul zou. Ulis, go Kristus wanib a araog abai migeu. Einen, du gonug Uwait nugau amegwab amban umaum muzmuz igual zaiger agal enimag ebu ze macaneu, Uwait nugau tibur agen oi hamacina, noun. <sup>11</sup>Go Sipsip Nag nug noumeun, gonugau eseu sil igual zaiger isanarena, go gusig omen. Go gonugau ze ze maraimai, igul go eiman han gusig omen, gonun, goagen goagal iwai zaiagar zilacaremen. Go goagal enimag en ban dabilab tam, go Yesus en noumabun dabilemen. <sup>12</sup>Gonun, ag duail el Mesgai wag daremen, ag siksikan. Bo, duail el ag em ebu mui ibut ze ebu daremen ag bisomagar. Uhu banou ag ebalagab zuamoroi. Satan go ag waiagab nou. Go banban aigsisileu, einen, go abiu, em e ebu dabun ziw as hogu usaleu.”

<sup>13</sup>Wazib banou go em ebu oi hem en abiu maimai, air go nag soligweun sesamorai betei uhu murabun guzeneun. <sup>14</sup>Bo, air go tumui banou nugau sau ulig morona, go gonugau empip du tamacag uzan em ula ebu pururai betei dareun. Go ebu wai ainarai mui wai tutak ula mazicina, tibur agen gumena, Satan nug go uhu murabun iborain tam. <sup>15</sup>Guzenaimai, go wazib nug gonugau ogusau ougeim ze esikaicina, ze go banou zewei sul usalaimai, air go beteun oi zabun aimai sesamorai beteun. <sup>16</sup>Bo, em nug air go isanoroun. Em oitina, ze go wazib nug useceun unum zeun. <sup>17</sup>Gonun, wazib go air go en banban aigsisilina, air go uteimai, go betei air gonugau ug abai malai mabun eun. Gonugau ug go Uwait nugau kasai ze sesamoranemen duail el. Go goagal oiagab petak aimai, go Yesus nugau

ze maraimai, gonugau igul suban sesamoranemen. <sup>18</sup>Wazib go malai mabun ibut ze gasag eim tapai dareun.

### Egun zag aliag usalemen.

**13** <sup>1</sup>Iz egun zag tub ibut ze ougeim zuna zuna, pemin. Gonugau gagalig ebuan malai houhou, gonugau gagalig kwali. Go gagalig ebuan malai houhou tutak tutak ebu gumaraneu du banou nugau *hat* sul daremen. Goagal gagalig tutak tutak ebu wanimag sikut wai heun dareu. Go wanimag unum Uwait seugab ze biabial kuai auremen. <sup>2</sup>Egun zag go go egun tub *lepet pusi* banou sul, bo, gonugau arab go egun tub *bea* nugau sul. Gonugau ogusau go egun *laion* nugau sul. Wazib banou nug egun zag go gonugau gusig moroun. Go gonugau gumaraneu du banou nugau hubabun biz mui, gonugau gumarabun gusig banou mui, moroun. <sup>3</sup>Egun gonugau gagalig tub wina, pisau waimai, noumabun sul, sug gul mui pemin. Getal go sug mui dareun, ulis gonugau sug sagaicina, koli naliu usaleun. Gonun, em ebuan duail el ag go uligaimai, esilakaimai, go sesamoremen. <sup>4</sup>Duail el go ag abiu wazib gonugtal gonugau gusig egun go moroun, gonun, gonugau wanib ulagwag moromen. Ag egun zag gonugau wanib han ulagwag maimai, guzenai ze memen, “In go egun zag go sul? In go egun go dual malai mabun iboin?”

<sup>5</sup>Uwait nug egun go io aurina, gonug gonugau wanib ulagwag maimai, Uwait ze biabial kuai aureun. Uwait nug gonugau gusig ze kuatai aurab tam. Go igul go guzenaneun, betei geil 42 maziceun. <sup>6</sup>Guzenaimai, Uwait ze biabial kuai aurabun bigegwaimai, ze meun. Uwait nugau wanib mui, gonugau uzan mui, gonugau duail el Mesgai wag darem abai ereg ze biabial kuai awareun. <sup>7</sup>Uwait nug go ulagzaba, gonug gonugau duail el abai alalaimai, gonugau duail el malai zilacareun. Gonug egun go gusig morona, duail el unum ug beu beu ebuan mui, enimag beu beu mui, ze beu beu mui, emgasag beu beu ebuan mui unum gumareun. <sup>8</sup>Getal Uwait nug em mui, emes mui, patai mab tam ebu go gonugau duail el goagal wanimag gonugau Sipsip Nag nugau awau dabun agau ebu sikut wai mareun. Sipsip Nag go duail el agen wina, noumeun. Duail el ag em e ebu darem, agal wanimag agau go ebu i dareu, ag unum egun zag nugau wanib ulagwag muramamen.

<sup>9</sup>Duair in go dabug a, go ze go suban dumau. <sup>10</sup>Duair in Uwait nug go hiacaranem zau oug hiacabun tapai mamau, go petak anem. Duair in go siag sil webi, noumabun tapai mamau, go petak pet siag sil webi, noumamau. Igul go petak zuba, na Uwait nugau duair uhu oimai, na ounab iau mui, nait ounab petak emen, go gusig patai danen.

<sup>11</sup>Guzenaimai, iz egun zag tub em oug zoun pemin. Gonugau gagalig ebu malai aliag, gonugau malai tub sipsip nag nugau malai sul, gonugau saiu ze meun go wazib banou nug gusig ze maneu sul. <sup>12</sup>Egun zag go

ianai aliag go amegai zoun egun zag nugau salau muraneun. Gonug em mui, duailel em ebu darem mui, agen egun zag ianai tutak go getal sug mui daimai, koli sug sagaiceun, go nugau wanib ulagwag murabun gusig awareun. <sup>13</sup>Go em ougeim zoun egun zag nug gugeg banou beu beu duailel abai mareun. Gonug gugeg tub duailel unum agal ameag ebu guzenai abai mareun. Emes wag eiman ab oi hina, em ebu aleun. <sup>14</sup>Go gugeg beu beu go meun, gonun, amegai zoun egun zag nug go gusig morona, go duailel unum em ebu polumareun. Go egun zag ianai aliag gonug duailel awarina, goagen amegai zoun egun zag go siag sil weun, noumab tam, koli naliu waseun ag gonugau dorog ulagwag murabun patai memen. <sup>15</sup>Guzenina, duailel agen egun go amegai ibut ze eiman zoun nugau dorog wag murabun patai memen. Guzenina, egun ianai aliag gonug go dorog wes morona, go ze mabun iboin. Gonun, duailel go gonugau wanib ulagwag mab tam gonug go ugaraba, noumabun aneun. <sup>16</sup>Egun zag go nug duailel unum, mogoi ginaginam, dudu banban, ecesab mui dudu, ecesab tamacag dudu, salau dudu, gaul dacanemen dudu mui awarina, goagal ebeag naliu eiman ta, goagal aipag ebu ta, sikut tub wai maramau. <sup>17</sup>Duailel inen ag egun gonugau sikut goagal ebeag ebu ta, aipag ebu i dareu go dudu ipal ebuan ee i gau mamam. Dudu go agen han go ebuan ee i gau mamam. Sikut go egun zag nugau wanib sul dareu. <sup>18</sup>Duair in go dabeleu naliu a, go suban dabeleimai, egun zag gonugau ianai suban nanalamau, einen, go ianai du tub nugau wanib sul dareu. Du gonugau ianai 666.

### Sipsip Nag nugau duailel pet.

**14** <sup>1</sup>Guzenaimai, iz kolital ameitaimai, Sipsip Nag go duailel 144,000 abai ereg Saion\* em tabag ebu tapai daremen uligaremin. Duailel go Sipsip Nag nugau wanib mui gonugau Memeg nugau wanib mui goagal aipag ebu sikut wai maremenin uligaremin. <sup>2</sup>Iz saiu naliu Mesgai wag eiman aleun domin. Go saiu ze salu banou nugau saiu sul mui, em guruina, saiu banou zuaneu sul mui. Go saiu naliu, dudu agen goagal wag wanemen sul. <sup>3</sup>Duailel 144,000 go Uwait nugau biz mui, ece iwanarai awau darem mui, dudu banban mui, agal ameagab ebu tapai daimai, kabal awau wai daremen. Duailel 144,000 go Uwait nug gau maraimai, em ebuan imareun, go kabal tutak awau go abiu mabun iboin. <sup>4</sup>Go duailel ag wal igul beu beu ipal i macanemen, gonun, ag Uwait nugau ameg ebu unu tamacag. Ag Sipsip Nag go erueiman wanena, go sesamorai aidanemen. Duailel go ag em ebuan duailel ipal ulacan Uwait nugtal gau mareun, gonun, ag Uwait nug mui, Sipsip Nag dual agal duailel pet. Duailel go awau wai ebuan ee wanemen sul. <sup>5</sup>Agal oiagsau eim polu ze tub i macanemen. Ag igul eg tub i macanemen. Agal igul naliupet pet.

### Uwait nugau tibur ainarai.

<sup>6</sup>Iz Uwait nugau tibur tub nug Mesgai wag eiman pururai aleun pemin. Go Uwait nugau Ze Naliupet muzmuz daneu duail el unum em ebu darem awarabun patai aleun. Duail el unum enimag beu beu mui, ug beu beu mui, ze beu beu mui, emgasag beu beu mui, em ebu darem awarabun aleun. <sup>7</sup>Go guzenai gusig uleun, “Ag Uwait en uminaiban, gonugau wanib tutak ulagwag moron. Einen, gonugau duail el sisiarabun ziwas aleun. Emes, em, ibut ze, ze kom unum usalareun, gonun, ag gonugau wanib ulagwag muramamen.”

<sup>8</sup>Uwait nugau tibur ianai aliag nug amegai aleun tibur sesamorai alaimai, guzenai aneun, “Babilon\* ban uzan go eg weun. Petak, go unum eg weun. Ban uzan gonug gonugau wal igul sesamorabun duail el ipal gusig awarina, go guzenanemen. Gonugau igul sul, gonugau wain ze gusig duail el unum marena, zaimai, kar wageun sul.”

<sup>9-10</sup>Uwait nugau tibur ianai ainarai nug go sesamarai zoimai, guzenai aneun, “Dair in go egun zag mui, gonugau dorog dual ulagwag moroimai, gonugau sikut gonugau ai u ebu ta, gonugau ebeg naliu eiman ta, oi damau, Uwait nug dair go en aigsisilaneu. Uwait nug dair go i bisomag pimau, go banban aigsisilaimai, unum eg maramau. Dair go Uwait nugau tibur naliu mui, Sipsip Nag nug dual goagal ameag ebu, *salpa* ab zabeg banou nug agamau. <sup>11</sup>Ab go eleimai, gonugau abmuk muzmuz damau gonug dair go mu eg muzmuz marai damau. Duail el go ag egun zag mui, gonugau dorog ulagwag moroimai, gonugau wanib nugau sikut agal aipag ebu ta, agal ebeag naliu eiman daneu mui, ag amban mui, umaum mui, mu muzmuz oimai, imai i damamen.”

<sup>12</sup>Igul eg go guzenai zuba, Uwait nugau duail el ag gonugau kasai ze sesamoraimai, agal oiagab Yesu en petak emen, gusig mai daimai, ag suban gusig tapai damamen.

<sup>13</sup>Guzenaimai, iz du tub nugau zeu Mesgai wag eiman guzenai ul weun, domin, “Na ze go guzenai sikut wen. Duail el ag ulis em e ebu Uwait nugau salau maimai, ag noumamamen agal oiagab naliu damamen.” Uwait nugau Ah Wes nug han guzent al aneun, “Petak pet, Uwait nug agal salau memen go gue abiu macaneu, gonun, ag oiagab naliu usalaimai, iau suban imai damamen.”

### Em ebu ee wabun ziwas.

<sup>14</sup>Gonun, iz koli wag ameitaimai, Mesgai wag pi ausiau ebu du tub go Du Nugau Nag sul, gumaraneu du nugau *hat* gol gonugau gagalig ebu maimai, gonugau ebeg sil sarep pataimai, hobo dareun pemin.

<sup>15</sup>Guzenina, Uwait nugau tibur tub go Uwait nugau zaueim daimai, noimai, du go pi wag ebu hobo dareu guzenai aureun, “Nait sarep go sil

ee kuatai onen, einen, ee wabun ziwas aleu. Em ebu ee naliu noi dareu, gonun, kuatai onen.” <sup>16</sup>Go guzenai ze mina, du go pi wag ebu hobo dareun gonugau sarep sil em ebu ee naliu useg mai dareun kuataimai, oon.

<sup>17</sup>Guzenina, iz tibur tub go Mesgai wag Uwait nugau zau eiman go han guzental sarep aig siua patai alina, pemin.

<sup>18</sup>Iz tibur tub ab gumei dacaneu pemin, go Uwait ulagwag muranemen biz ebu aleun. Gonug tibur go sarep aig siua mui guzenai gusig uleun, “Nait sarep aig siua sil em ebuan wain dab epelai dareu kuatai en. Einen, go wain epelai darem.” <sup>19</sup>Gonun, gonug sarep sil wain dab epeleun em ebuan kuatai oimai, wain pasianem empip eun. Go Uwait nug aigsisilaneu nugau dorog sul. <sup>20</sup>Go wain dab pasianem empip go ban uzan uzaneim dareu. Go wain eseu go zewei nuaneu em huia handret ainarai kilomita, gonugau unig banou, go aliag mita sul.

**Uwait nugau tibur kwali agen uhu eg pet kwali oi zomen.**

**15** <sup>1</sup>E banou iz igul awau abai milabun Mesgai wag zuna, uligaimai, iz esilakemin. Iz tibur kwali daremen uligaremin. Go uhu eg pet kwali duail el eg marabun oi alemen. Uhu eg go zoimai wanena, uhu ipal duail el ebalagab koli i zumau, einen, Uwait nugau aigsisilaneu unum utamau.

<sup>2</sup>Guzenaimai, iz ibut ze iror tub sul ab mui gotulareun pemin. Go ibut ze gasag duail el ipal agen gusig tapai daimai, egun zag mui, gonugau dorog mui, gonugau wanib nugau sikut mui, unum zilacaremen, uligaremin. Duail el go Uwait nug go tutak tutak gita marena, patai daremen. <sup>3</sup>Guzenaimai, go Uwait nugau salau du Moses nugau kabal mui, Sipsip Nag nugau kabal mui, guzenai kabal wemen, “Uwait Ban, na gusig banou mui. Nait salau beu beu naliupet pet, gonun, iz uligaimai, esilakem. Na em ebuan duail el unum goagal gumaranem du banou. Nait sisiarabun igul unum tuguianau pet. <sup>4</sup>Ban, na tutak, na naliupet pet, gonun, duail el unum na uminizeimai, nait wanim ulapwag mamam. Petak, na tutak naliupet pet. Emgasag ipal ebuan duail el unum alaimai, nait wanim ulapwag mamam, einen, nait igul naliu go unum uligemen.”

<sup>5</sup>Guzenaimai, dai dai, iz koli Mesgai wag Uwait nugau Nou Zau pemin. Iz go ebu, gonugau salap zau im oitai dareun pemin. Uwait nug go salap zaueim dacaneun. <sup>6</sup>Go tibur kwali agen gonugau zau eiman uhu eg pet kwali oimai, go uzaneim alemen. Go tibur galau naliu unu tamacag ausiau pet arugaimai, *gol* let sil toronag kulai memen. <sup>7</sup>Ece iwanarai go awau dacanemen, tutak nug tebil *gol* kwali oimai, go tibur kwali mareun. Uwait nug muzmuz dacaneu nugau aigsisilaneu go tebil *gol* oug kapai zoun. <sup>8</sup>Uwait nugau zau banou zaueim abmuk kapai dareun. Go abmuk Uwait nugau al banou ebuan mui, gonugau gusig ebuan mui ereg

gotulaimai, alaneun. Duail el zaueim go siabun iborain tam. Uwait nugau tibur kwali agen uhu eg kwali agal salau poebi, go petak simamen.

**Uwait nugau aigsisilaneu, go tebil kwali oug dareun esikemen.**

**16** <sup>1</sup>Guzenaimai, Uwait nugau zau eiman du tub nugau zeu banou domin. Gonug Uwait nugau tibur kwali guzenai awareun, “Ag Uwait nugau aigsisilaneu tebil kwali oug dareu oiban, betei em ebu esikai han.”

<sup>2</sup>Gonun, Uwait nugau tibur ianai tutak nug gonugau tebil em ebu esikai heun. Guzenina, duail el go egun zag nugau sikut omen mui, gonugau dorog wanib ulagwag macanemen go ebalagab suiag eg beu beu mu banou mui zoun.

<sup>3</sup>Guzenaimai, tibur ianai aliag gonug gonugau tebil oimai, betei ibut ze ebu esikeun. Guzenina, go ibut ze noumemen dudu agal esepag sul kekulina, ibut ze ougan ece mui, egun mui, unum awau daremen noumemen.

<sup>4</sup>Guzenaimai, tibur ianai ainarai nug gonugau tebil ban ze mui, ze kom mui ebu goriena, ze unum es usalemen. <sup>5</sup>Ze gumaneu tibur nug guzenai aneun, iz domin, “Uwait, na ulis darem, na getal daremen. Na duail el go suban sisiaraimai, uhu go ebalagab mabun tapai memen, go petak. Uwait na naliupet pet. <sup>6</sup>Go duail el agen Uwait nugau duail el mui gonugau ze doimai, awarenemen dudu goagal esepag esikai hemen. Guzenaimai, nagen ag esepag go marena, zemen. Go agal igul eg guzenemen sultal go guzentel koli ameg omen.” <sup>7</sup>Guzenaimai, iz du tub nugau zeu sul nug Uwait ulagwag muranemen biz eiman guzenai ze meun domin, “Uwait Ban, na gusig banou mui. Nait sisiaranem igul unum tuguiai naliupet pet.”

<sup>8</sup>Guzenaimai, tibur ianai iwanarai nug gonugau tebil am ebu esikai heun. Uwait nug am nug duail el unum agaramaun gusig moroun. <sup>9</sup>Go am nugau wes zabeg pet usalaimai, duail el go elarina, goagen Uwait eg ze auremen. Uwait nug uhu go eg gusig unum mui gumaraneu, bo, duail el go agal igul eg ebuan koli oiagab kekulaimai, gonugau wanib ulagwag murab tam.

<sup>10</sup>Guzenaimai, tibur ianai tabkuai nug gonugau tebil egun zag nugau hubaneu biz ebu esikai heun. Guzenina, egun zag nugau gumaraneu empip umuteun. Gonugau duail el abai goagal aiag katutai daremen, einen, go mu banou omen. <sup>11</sup>Go suiag mu eg mui oimai, Uwait Mesgai wag dareu eg ze auremen. Bo, goagal igul eg ebuan koli oiagab kekulab tam.

<sup>12</sup>Guzenaimai, tibur ianai was olig nug gonugau tebil oi betei Iupretis Ze banou ebu esikai heun. Ze go unum ziceun, go am zuaneun ebuan gumaraneu dudu banban alabun agal abu olou kalai mareun.

<sup>13</sup> Guzenina, iz wes eg ainarai balbolou sul uligaremin. Balbolou tub wazib nugau ogusau ougeim aleun, tub egun zag nugau ogusau ougeim aleun, tub Satan nugau polu ze doimai, awaraneu du nugau ogusau ougeim aleun. <sup>14</sup> Satan nugau wes eg goagen gugeg beu beu abai maraimai, agen emgasag gumaranemen dudu banban agal malai dudu abai unum betei gotularaimai, Uwait nugau sisiarabun ziwas banou ebu Uwait dual malai mabun guzenemen.

<sup>15</sup> Guzenaimai, Dubanou Ban nug guzenai aneun, “Ag go don. Iz zob du sul alai. Du in iz gumilaimai, go gonugau tibur galau waugab maimai, go i ninamau, gonugau ougab naliu usalamau. Guzenaimai, iz alemin, go duail el ameagab ebu ai u nuabun burum i aidamau.”

<sup>16</sup> Guzenaimai, wes eg agen uzan tub go Hibru ze eiman gonugau wanib Armagedon anem go ebu, gumaranem dudu banban imarai betei gotularemen.

<sup>17</sup> Guzenaimai, tibur ianai kwali nug gonugau tebil wol ebu esikai eun. Uwait nugau zaueim gumaraneu du banou nugau biz ebu Uwait nug guzenai aneu, “Go igul unum go poai dareu.” <sup>18</sup> Guzenaimai, amilaimai, em guruaimai, sai u heimai, mim banou zoun. Uwait nug em usalai meun ziwas ebu, alai ulis, duail el ag mim banou guzenai zuna, piab tam. Go mim zoun, egonou pet. <sup>19</sup> Mim gonug ban uzan wanib banou mui eg moroimai, doun ainarai doun mizanareun. Em gasag beu beu agal ban uzan han unum eg mareun. Uwait go Babilon ban uzan en dabeleimai, go en banban aigsisileun, gonun, go ban uzan go unum eg pet moroun. <sup>20</sup> Em waug mui, em tabag mui, unum wagem eun. <sup>21</sup> Emes wageim ze dab banban noun. Go ze dab noun gonugau uhu houhou tabkuai (50) kilogram sul. Go ze dab emes wag eiman duail el ebalagab noun. Uwait nug go ze dab palautina, alai go unum eg mareun, gonun, goagen Uwait eg ze auremen.

### Air tub go egun wag hobo i dareun.

**17** <sup>1</sup> Tibur kwali agen tebil kwali patai daremen tub nug iz guzenai aileun, “Na alen! Wal igul maneun air go ze banban asi u alai gotulemen ebu hobo i dareu, Uwait nug go ein uhu muramau iz na abai mizai. <sup>2</sup> Em ebu, gumaranemenin dudu banban go air go dual wal igul macanemen. Duail el ipal go han air go dual wal igul umkoskos maimai, ze wain gusig zaimai, dabui ag guganeu sul guzenai daremen.”

<sup>3</sup> Uwait nugau Ah Wes nug iz gusig gumilina, wabil eiman sul, gonugau tibur nug iz imaileimai, du tamacag uzan em ula ebu imailai beteun. Go ebu, iz air go egun zag tub epeua ebu hobo i dareun pemin. Go egun nugau enib ebu ze biabial kuai ze mui, eg ze mui, sikut asi u wemen dareun. Egun zag go gonugau gagalig kwali, gonugau gagalig eban malai houhou. <sup>4</sup> Go air go tibur galau ali ag arugeun, tibur galau tub

epeua, tibur galau tub gulin sul, go iweiu naliu gol mui, aiwag naliupet beu beu mui, galoloi naliu wanib *pel* mui maimai, dareun. Air gonugau ebeq sil gap gol pateun. Go gap oug gonugau igul eg ipal mui wal igul eg mui kapai dareu. <sup>5</sup>Gonugau aiw ebu ze ipal bigeg wageimai dareu, guzenai sikut wai memen, “Babilon ban uzan wanib banou mui! Go duailen wal igul macanemen mui, ipal igul eg pet em e ebu macanemen agal anaiag.” <sup>6</sup>Air gonug Uwait nugau salau duailen ugaraimai, goagal esepag zaimai, dabug guganeun. Go salau duailen go Yesus nug en goagal oiagab petak aimai, gonugau ze marai aidanemenin.

Iz air go uligaimai, gusig ban esilakaimai, dabeleu asiu omin. <sup>7</sup>E tibur nug aileun, “Na einen esilakem? Iz na air go mui, egun zag gonugau gagalig kwali, gonugau malai houhou, gonug air go imai unaneu dual, goagal bigeg getal wageimai dareun araog aizai. <sup>8</sup>Egun zag go na pemen go getal dareun, ulis i dareu, go koli ob bigeg tamacag ougeim zoimai, go unum noumamau. Duailen ag em ebu daremen, getal em usaleun ziwass ebu, agal wanimag awau dabun agau ebu sikut wai mab tam, ag egun zag go uligaimai, ag esilakaimai, dabeleu asiu umamen. Einen, go getal dareun, ulis go i dareu, bo, aiw ses go koli zumau.

<sup>9</sup>Duair in go dabeleu naliu mui go gue bigeg abiu mamau. Gagalog kwali go em tabag kwali go air go gue em tabag ebu hobo i daneu.

<sup>10</sup>Gagalog kwali go han gumaranemen dudu banban kwali. Go gumarabun dudu tabkuai go getal noumemen. Ulis tutak nug dareu. Gumarabun du tub i zuau dareu. Go zoimai, ziwass hui i damau. <sup>11</sup>Egun zag go getal dareun, ulis go i dareu, gonugtal koli gumarabun du ianai gugan usalamau. Bo, go gumaranemenin dudu kwali noumemen ebuan tutak nug koli usaimai, betei betei unum noumamau.

<sup>12</sup>Na malai houhou pemen, go gumarabun dudu houhou. Dudu go ag gumarabun gusig ulis wab tam bo, ag gusig oimai, ziwass ban i damamen, go aua tutak ebu egun zag nug dual duailen gumarabun damamen. <sup>13</sup>Go gumarabun dudu houhou agal dabeleu tutak, agen agal gumarabun gusig go egun zag muramam. <sup>14</sup>Dudu houhou agen Sipsip Nag dual malai mamam. Bo, Sipsip Nag mui, gonugau sesamoranemen dudu agal oiagab petak emen nugtal gonugau tapai mareun mui, agen go gumaranemenin dudu abai alalaimai, zilacaremen. Einen, Sipsip Nag go dudu banban agal du banou. Go han gumaranemen dudu agal gumaraneu du.”

<sup>15</sup>Tibur gonug iz kolital guzenai aileun, “Na ze go wal igul maneun air go ebu hobo i dareun pemen, go duailen agal doropag. Duailen go ag emgasag unum beu beu ebuan, ug beu beu ebuan, enimag beu beu ebuan, ze beu beu ebuan. <sup>16</sup>Na gagalog ebuan malai houhou go pemen, goagen egun zag mui gotulaimai, go wal igul maneun air gasag muramam. Goagen gonugau ece tibur galau mui unum oi ebi, go burum damau. Goagen gonugau enib tabug zaimai, go unum ab oug agamam.

<sup>17</sup>Uwait nugtal dabeleu mareun, gonun, gonugau dabeleu sesamoraimai, ag dabeleu tutak maimai, go agal gusig egun zag muramam. Go guzenebi, gonug duailel gumarai, betei betei Uwait nug ze aneun go unum petak zumau. <sup>18</sup>Na air go pemen, go ban uzan wanib banou mui, gonug em ebuan gumaranemen dudu unum gumaraneu.”

**Babilon\* ban uzan go unum eg weun.**

**18** <sup>1</sup>Go guzenina, iz Uwait nugau tibur tub Mesgai wag eiman aleun pemin. Gonugau gusig banou pet, gonugau iweiu nug em unum al ilai heun. <sup>2</sup>Gonug guzenai gusig ul weun, “Babilon ban uzan wanib banou mui, go eg weun! Babilon ban uzan unum eg weun! Uzan go ebun wes eg mui meg eg unu a, go sag dacanemen. <sup>3</sup>Emgasag ipal ebuan duailel unum go uzanan wal igul sesamoranemen, ag wain ze gusig zaimai, dabuiag guganeu sul. Em ebuan gumaranemen dudu banban ag han go dual wal igul macanemen. Duailel uzan go darem, ag ee ban agabun ecesab asiu em ebuan ecesab palautanemen dudu ebuan gau mina, go dudu ag uzanan duailel agal aiwag asiu wanemen.”

<sup>4</sup>Kolital iz du tub nugau zeu Mesgai wag eiman guzenai aneun, domin, “Izal duailel ag go ban uzan uteiban, alan! Ag go uzanan igul eg i sesamoran. Einen, go uhu umau, go ag go dual i umamen! <sup>5</sup>Gonugau igul eg go ecesab sul mugunina, Mesgai wag sieun. Uwait nug go uzanan igul eg koli dabilaneu. <sup>6</sup>Air gonug ein igul eg ag ebalagab guzeneun sultal agen han koli go ebun guzentel guzenamamen. Gonug ein igul eg ag ebalagab meun, agen go ebun ziwas aliag guzenamamen. Go wain ze gusig gap oug kekulaimai, mareun, gonun, agen koli wain ze gusig pet morobi, zumau. <sup>7</sup>Go nugtal gonugau wanib wag maimai, wal igul eg macaneun. Agen gonugau igul eg macaneun sultal go mu asiu morobi, uhu umau. Go nugtal guzenai ze macaneu, ‘Iz gumaranem air banou pet, izal biz ebun hobo darem. Iz wab air tam. Iz ebi lab uhu tub i alamau, gonun, iz oiab eg i umau.’ <sup>8</sup>Go ze go aneu, gonun, uhu ata atai ipal go ebun gil tutak ebutal zumau. Ebeu eg asiu zuba, uzanan duailel go ag weinamamen, we banou zumau. Air go gue ab nug unum elamau, einen, Uwait Ban go gusig banou mui gonug air gonugau igul eg sisiai uligaimai, go ze asiu mui eu.”

<sup>9</sup>Em ebuan gumaranemen dudu banban ag air go dual wal igul maimai, ee banou agaimai dacanemen, dudu go ag ban uzan ab nug eleimai, abmuk zuba, uligaimai, ag air go en banban weinamamen. <sup>10</sup>Ag air gonugau uhu ereg wab aimai, uminaimai, tubaiman tapai daremen. Ag guzenai ze memen, “Bisoua, bisoua, Babilon, na ban uzan, na ban uzan wanim banou mui. Nait igul eg nug koli kekulaimai, pigai eg mizeu!”

<sup>11</sup>Em ebuan ecesab palautanemen dudu ag go Babilon ban uzan nug en oiagab egwina, go weinemen, einen, du tub nug agal ecesab koli i

gau mamau. <sup>12</sup>Agal palautanemen ecesab go gol, silva, aiwag naliupet, galoloi naliu wanib *pel*, tibur galau ausiau naliu, tibur galau karakun naliu, tibur galau *slika*, tibur galau epeua mui. Ipal palautanemen ecesab a sous naliu mui beu beu mui, ecesab ipal *elephant* nugau aig sil patai memen mui, ecesab ipal ag a beu beu mui, *ain bras*, *ain*, *mabel* aiwag eiman patai memen. <sup>13</sup>Palautanemen ecesab ipal go bereu, gunai, garai sous zuaneu, a ilau sous zuaneu beu beu, wain ze, a ilau wanib ‘olib’, plaua, wit, bulumakau, sipsip, *hos*, *karis* mui. Go salau duail el doropag mui han palautemen. Ulis ecesab gau mabun du tub i dareu.

<sup>14</sup>Ecesab palautemen dudu go agen uzan go guzenai auramam, “Ecesab naliu go na wacanem ounab nug alaneun go utizeun. Nait ecesab asiu mui, iweiu naliu go unum wagemun, na koli i pimam.” <sup>15</sup>Ecesab asiu palautaimai, aiwag wanemen dudu go ag air gonugau uhu umam aimai uminaimai, tubaiman tapai daimai, oiagab eg wina, weinai daremen. <sup>16</sup>Go guzenai ze memen, “O, ban uzan wanim banou mui, bisoma, bisoma, getal na tibur galau naliu ausiau mui, gulin sul mui, epeua mui, arugaimai, gol aiwag naliupet, galoloi naliu wanib *pel* mui, go sil iweiu pianaimai dacanemen. <sup>17-18</sup>Nait ecesab aiwag banou sil gau memen unum pigai eg wemen.”

Tebil gumanem dudu, duail el ipal tebil oug aidanemen, tebil patanemen dudu, tebil ebu salau macanemen dudu mui, go unum tubaiman tapaimai pei daremen. Go gonugau abmuk zuna, uligaimai, guzenai ulemen, “Ban uzan go wanib mui, ban uzan tub go sul i dareu.”

<sup>19</sup>Go em waibul oimai, agal gagaliag ebu maimai, weinaimai, oiagab egonou mui daremen. Go guzenai ze memen, “Bisoua, bisoua, go ban uzan wanib banou mui, go eiman ibut ze ebu salau macanemen dudu ag ecesab asiu wanemen. Pigai gonugau ecesab unum eg wemen.”

<sup>20</sup>Na Mesgai mui, Uwait nugau duail el mui, Yesus nugau ze oi aidanemen dudu mui, Uwait nugau ze doimai, awarenemen dudu, ag go ban uzan guzeneu en agal oiagab naliu usalan. Einen, ban uzan gonug ag ebalagab igul eg mareun, gonun, Uwait nug go uzanan igul eg sisiaimai, eg moroun.

<sup>21</sup>Ze go mazicina, tibur tub gusig mui nug aiwag banou uhua tub oimai, ibut ze oug hamaceimai, guzenai aneun, “Ai wag go noun sul, Babilon ban uzan han guzent al unum numau. Duail el ag go koli i pimamen. <sup>22</sup>Babilon uzan dudu agen wag wanem, kabal wanem, ar ninanem, pulel huanem, duail el saiu go koli i dumamen. Dudu salau macanemen ag koli i piaramamen. Wit tuanem gonugau saiu han ag i dumamen. <sup>23</sup>Nagen al manem koli al i mamam. Na ebizab, du air zaug dual awau egarabun agal zaiagar abai ze mebi, koli i dumamen. Getal nait ecesab palautanemen dudu ag dudu banban ecesab asiu mui, agen dudu ipal em ebu unum zilacaremen. Nait eten ze nug em ebu an duail el unum polumarena, go nait igul unum sesamoranemen.”

<sup>24</sup>Uwait nugau ze doimai, awarenemen dudu mui, gonugau salau dudu mui duail el ipal unum em ebu ugarina, noumemen, goagal esepag esikeun go unum Babilon uzan uligemen, gonun, Uwait nug Babilon uzan uhu banou moroun.

**Duail el Mesgai wag Uwait nugau wanib ulagwag moromen.**

**19** <sup>1</sup>Kolital iz duail el asiu pet agen Mesgai wag guzenai gusig ulemen, domin, “Haleluia! Ig Uwait nugau wanib ulagwag murab! Gonug ig koli imaigeun, go igual Uwait, gonugau wanib ulagwag banou mui, go gusig mui. <sup>2</sup>Gonugau sisicigabun igul go petak tuguianau pet. Wal igul maneun air go gonugau wal igul nug em eban duail el unum eg mareun. Gonug Uwait nugau salau muranemen dudu ugarina, noumemen, gonun, Uwait nug air go gue ze mui aimai, uhu banou moroun.” <sup>3</sup>Go koli guzenai gusig ulemen, “Haleluia! Ig Uwait nugau wanib ulagwag murab. Air go ab nug eleun, abmuk go utab tam, muzmuz dareu.” <sup>4</sup>Dudu banban 24 go mui ece iwanarai awau darem agen Uwait nug gonugau biz ebu hoboi dareu ebu taubib waimai, gonugau wanib ulagwag moromen. Go guzenai ulwemen, “Haleluia! Ig Uwait nugau wanib ulagwag murab. Petak.”

<sup>5</sup>Iz Uwait nugau biz eiman du tub nugau zeu guzenai aneun domin, “Ag, Uwait nugau salau dudu, ag gonugau duail el unum wanimag tamacag mui, wanimag mui, ag Uwait uminaimai, gonugau piu dacanemen, gonun, agen gonugau wanib ulagwag moron.”

**Sipsip Nag air umau ebu gonugau ee banou zabun ziwas.**

<sup>6</sup>Guzenaimai, iz duail el asiu ulemen domin. Goagal zepag ze salu nugau saiu sul mui, em guruaneu sul. Go guzenai gusig ulemen domin, “Haleluia! Ig Uwait nugau wanib ulagwag murab! Go igual Ban, go gusig unum a. <sup>7</sup>Ig igual oigeb naliu usalaimai, siksikaimai, go ulagwag murab. Sipsip Nag nugau air wabun ziw as aleu. Gonugau wau han iwei arugaimai, gumei dareu. <sup>8</sup>Air go tibur galau ausiau naliu arugabun moromen.” (Tibur galau go ausiau go Uwait nugau duail el agal igul naliu macanemen nugau dorog.)

<sup>9</sup>Gonun, Uwait nugau tibur nug guzenai aileun, “Na guzenai sikut wen. Duail el inen ag Uwait nug Sipsip Nag nug air wabun ee mis banou mamau ebu alabun aimai awaramau, ag siksikamamen.” Go koli guzenai aileun, “Ze e go Uwait nugau petak ze.”

<sup>10</sup>Guzenina, iz go tibur nug ulagwag murabun taubib waimai, gonugau wanib ulagwag murabun guzenemin. Bo, gonug iz guzenai aileun, “Na igul go i guzenen! Iz na mui, nait zaunar abai agal salau zaiag, ig ereg Yesu nugau ze maranem. Na Uwait tutak ulagwag moren! Yesu nugau petak ze nug, Uwait nugau ze doimai, awarenemen dudu agal oiagab asaraba, agen Yesu nugau wanib araog macanemen.”

**Du tub go *hos* ausiau wag hoboï dareun.**

<sup>11</sup> Guzenaimai, iz Mesgai im oitina, *hos* ausiau tub darena, pemin. Du tub *hos* go ebu hoboï dareu gonugau wanib enai, ‘Go petak ze maimai, Uwait nugau ze unum suban maraneu.’ <sup>12</sup> Gonugau ameg go ab al sul, gonugau gagalig ebu gumaranemen dudu banban agal *hat* asiu mai dareun. Gonugau ai ebu wanib tub sikut wemen dareu, bo, duailel ag wanib go ag i abiu, nug sag go wanib go abiu. <sup>13</sup> Gonugau tibur galau unum eseu oug heimai, tuageun. Gonugau wanib go ‘Uwait nugau ze’ em. <sup>14-15</sup> Mesgai wagan malai dudu agen tibur galau ausiau naliu arugaimai, agal *hos* ausiau igaraimai, go sesamorai wanemenin. Malai dudu go agal gumaraneu du banou nug gonugau ogusau ebu maulzag aig siua maimai, duailel em ebu unum ugarabun aleun.

Go gumaraneu du nugau malai hog pataimai, duailel unum gusig gumaramau.

*Buk Song 2:9*

Gonug wain dab pasiai heanem sul guzenaramau. Go Uwait gusig unum mui, gonugau aigsisilaneu nugau dorog. <sup>16</sup> Gonugau tibur galau ebu, gonugau hou ebu mui, wanib guzenai sikut wai memen dareu. ‘Go gumaranemen dudu agal gumaraneu du. Go dudu banban agal du banou.’

<sup>17</sup> Kolital, iz tibur tub am ebu tapai dareun pemin. Gonug meg inain emes wag ai daremen, guzenai ulareun, “Ag unum Uwait nugau ee banou zabun alamamen. <sup>18</sup> Ag alai, emgasag gumaranemenin dudu banban agal animag tabug mui, malai dudu agal gumaranemenin dudu agal animag tabug mui, dudu gusig mui, agal animag tabug mui zimamen. Ag *hos* inain agal animag tabug mui, dudu *hos* wag hobemen agal animag tabug mui zimamen. Ag duailel unum goagal animag tabug zimamen. Ag salau dudu mui, dudu agtal agal salau gumanemen mui, dudu wanimag banou a mui, dudu agal wanimag banou tamacag mui, unum goagal animag tabug zimamen.”

<sup>19</sup> Guzenaimai, iz ameitaimai, egun zag em e gumaranemen dudu banban mui, agal malai dudu abai ag gotulaimai, du go *hos* wag eiman aidareu, gonugau malai dudu abai, malai mabun ina uligaremin. <sup>20</sup> Bo, du go *hos* wageim aidaneu gonug egun zag mui, gonugau polu ze maraneu du aliag gusig patareun. Polu ze maraneu du gonug getal egun zag nugau ameg ebu gugeg beu beu meun. Duailel egun zag nugau sikut oimai, egun zag gonugau dorog ulagwag muranemen, ag gonugau gugeg uligaimai, petak aimai dabilemenin. Go egun zag nug mui gonugau polu ze doimai, awaraneu du mui, go gusig pataraimai, ab *salpa* mui elei dareu oug awau hamaremen. <sup>21</sup> Agal malai dudu du go *hos* wag eiman aidaneu du nug gonugau maulzag aig siua go gonugau ogusau ougeim noi dareu go sil agal malai dudu unum ugarina, noumemenin. Guzenina, meg inain agen goagal animag tabug unum tugei zina, biguiag zoun.

**Satan go wai tausen tutak ob oug hiacaranem zau oug damau.**

**20** <sup>1</sup>Iz koli ameitaimai, tibur tub Mesgai wag eiman aleun pemin. Gonugau ebeg sil ob bigeg tamacag ebuan wakum, *sen* banou mui patai aleun. <sup>2</sup>Gonug go getalan wazib banou, Satan gusig pataimai, *sen* us sil otoi mina, wai tausen tutak guzenaital dareun. <sup>3</sup>Tibur go nug go imai aimai, ob bigeg tamacag oug maimai, ob ogusau go wakum sil gusig patai im gebeun. Guzenina, go duail el em ebu koli polumarabun iborain tam. Go go ebu damau wai tausen tutak mazicaba, go petak ag go ob oug eiman utebi, zoi ai damau. Bo, go zoi ban i ai damau.

<sup>4</sup>Iz gumaranemen dudu agal biz uligaremin. Go ebu duail el hobo daremen. Uwait nug ag duail el sisiarabun salau mareun. Iz koli ametaimai duail el ipal noumemenin agal doropag uligaremin. Duail el go ag Yesus nugau petak ze mui Uwait nugau ze duail el ipal awaremenin, gonun, dudu ipal agen belag kuatarena, noumemenin. Ag egun zag mui, gonugau dorog dual i ulapagwag macanemen. Ag gonugau sikut agal aipag ta, ebeag ebu wab tam. Duail el go koli awau asaimai, Kristus dual go wai tausen tutak ougtal duail el gumaramam. <sup>5</sup>Getal duail el ob oug eiman guzenai asab tam, agen ulis amegai ob oug eiman asamamen. (Ziwas go ebu, duail el ipal han noumemenin ag koli pigai i asamam. Go wai tausen tutak mazicaba, petak ag unum koli asamamen.) <sup>6</sup>Go duail el ag amegai koli asamamen, ag Uwait nugau duail el pet daimai, ag siksikamamen. Koli noumabun nugau gusig nug go duail el i eg maramau. Bo, ag Uwait mui Kristus dual agal ula dabun duail el daimai, Kristus nug dual wai tausen tutak duail el gumarai damamen.

**Satan go eg weun.**

<sup>7</sup>Go wai tausen tutak mazicaba, ag ob bigeg tamacag im oitebi, Satan utebi, unamau. <sup>8</sup>Go ob oug eiman zoimai, em ebuan duail el unum polumaraimai, imarabun unamau. Go Gog emgasag mui Magog emgasag mui beteimai, em go ebuan duail el unum malai mabun gotularamau. Agal ianai go zimagan us sul damau. <sup>9</sup>Ag em go unum betei aidaimai, uzan go Uwait nug gonugau ougab nug noumeu mui, empip go gonugau duail el darem mui, unum taliaraimai, kataramamen. Bo, ziwas go ebu, ab Mesgai wageim noimai, go unum elaramau. <sup>10</sup>Satan nug duail el polumaraneu, go tibur agen gusig pataimai, ab *salpa* mui elaneu ebu, egun zag go, gonugau polu ze doimai, awaraneu du dual hiacarebi, daremenin ebutal hebi, numau. Go ag abai ereg mu banou muzmuz oi damamen.

**Noumemen duail el agal sisiarabun ziwas**

<sup>11</sup>Uwait nug gumaraneu du nugau biz ausiau banou ebu hobo darena, iz pemin. Emes mui, em mui, unum mazi wage memenin, koli piabun iborain

tam. <sup>12</sup>Iz noumemenin duailel wanimag a mui, wanimag tamacag mui, go biz amegwab tapai daremen uligaremin. Tibur agen agau ipal oitemenin. Agau tub go awau dabun agau han oitemenin. Getalan noumemen duailel ag em ebu daimai, ein salau memen guzentel agau ebu sikut wemen dareu, go sikut nug ag sisiramaui. <sup>13</sup>Ibut ze ebu noumemen duailel ag han ibut ze ebuan asaimai, alai biz go amegwab tapai daremen. Noumabun igul mui, duailel noumemen agal uzan mui, duailel ipal go ebu daremen go ebuan utarai wanena, duailel go han biz go amegwab tapai daremen. Ag unum ein salau memen, guzentel sisiramaui. <sup>14</sup>Guzenaimai, noumabun igul mui, duailel noumemen agal uzan mui, ab muzmuz elaneu oug amai hiacaramam. Ab go muzmuz elaneu go noumabun ianai aliag. <sup>15</sup>Duair in gonugau wanib awau dabun agau ebu i dareu, go han ab banou elei dareu oug amai hiba, numau.

### Emes awau mui, em awau mui, usalemen.

**21** <sup>1</sup>Iz emes awau mui, em awau mui piaremin. Emes amegai dareun mui, em amegai dareun mui, go unum wagememen. ibut ze han wagemem. <sup>2</sup>Iz ban uzan naliupet pet, go Zerusalem awau, Uwait nug Mesgai wag dareu eiman alina alina, pemin. Uzan tub go air tub du wabun iweiu naliu aruganeu sul meun. <sup>3</sup>Iz Uwait nugau biz eiman du tub nugau zeu guzenai ze meun domin, “Ulis, Uwait nugau zau duailel ula damau. Go ag abai damau. Ag gonugau duailel damamen. Uwait nugau ag abai daimai, go agal Uwait damau. <sup>4</sup>Gonug duailel agal ameag ilau unum gulesamaui. Duailel ag koli i noumamamen, oiagab eg i umau, i weinamamen, ag mu i umamen. Go getalan igul unum wane anemenin.”

<sup>5</sup>Uwait nug biz ebu hoboimai, guzenai aneun, “Na go uligen! Iz e ecesab unum awau usalarai mem.” Guzenaimai, gonug koli aneun, “Na guzenai sikut wen, ze e petak pet, go en agal oiagab petak abun iboin.”

<sup>6</sup>Guzenaimai, go iz guzenai aileun, “Ecesab go unum usalarai mem, zoun ulis darem. Iz izasag amegai daremin, izasag ulis darem. Izasag ecesab unum bigeg usalaremin, koli izasag salau go pocemin. Duair in go ze useg umau, go izal ze kom ebuan ze zimau. Ze go muzmuz awau dabun ze go i gau mamaui, gaul moromin, zimau. <sup>7</sup>Duair in go igul eg unum zilacoromau, go izal ece naliu umau. Iz gonugau Uwait dai, go izal gelear alear damam. <sup>8</sup>Bo, duailel ag uminaimai, malai eiman koli alanem mui, duailel agal oiagab petak ab tam mui, duailel ag igul eg pet macanemen mui, duailel ag duailel ipal ugarina, noumemen mui, duailel ag wal igul macanemen mui, duailel ag eten macanemen mui, duailel ag polu tibur agal doropag wag macanemen mui, duailel polu ze macanemen mui, go ag unum agal uzan ab banou *salpa* mui eleimai, i useaneu ebu numamen. Go ianai aliag noumamamen.”

### Zerusalem awau.

<sup>9</sup>Uwait nugau tibur kwali agen uhu eg kwali tebil kwali oug kapai zoun patemen, go 7 ebuan tutak nug alaimai, iz guzenai aileun, “Na

alemen, iz Sipsip Nag gonugau air umau abai mizai.” <sup>10</sup>Go guzenai ailina, Uwait nugau Ah Wes nug gusig gumilina, wabil eiman sul, tibur gonug imaileimai, em tabag banou ebu imailei beteun. Gonug ban uzan naliupet pet, wanib Zerusalem, Uwait nug Mesgai wag dareu eiman alina alina, abai mileun. <sup>11</sup>Uwait nugau al banou uzan go al elei dareun. Al hilanau go banou pet, aiwag naliu tub wanib zaspasul mui, aiwag tub wanib kristol unu tamacag sul ilaneu. <sup>12</sup>Ban uzan go gilana wag pet. Go ebu, abuog begurug dareu. Uwait nugau tibur begurug agen go abuog begurug gumei dacanemen. Go abuog ebu Israel duailag agal ug begurug agal wanimag sikut wai memen. <sup>13</sup>Uzan tub, abuog unum ainarain tubaim tubaim darem. Abuog ainarain tub go am zuaneun eiman darem, abuog ainarain tub go am nuaneun eiman darem, abuog ainarain tub go *not* darem, abuog ainarain tub go *saut* darem. <sup>14</sup>Ban uzan go gilana gusig mabun aiwag begurug sil em ebu memen, aiwag go ebu Sipsip Nag nugau ze oi aidanemen dudu agal wanimag darem.

<sup>15</sup>Uwait nugau tibur go gue iz ibail ze meun, go kabit gol *rula* sul pataimai, uzan go mui, abuog mui, gilana mui agal huia eru neneg nanalai piabun guzeneun. <sup>16</sup>Uwait nugau tibur nug ban uzan gonugau kabit sil nanalai uligeun. Go ban uzan nugau huia, gonugau gereu sul dareu. Ban uzan go gonugau huia 2,200 kilomita, gonugau gereu, gonugau gilana tapai dareu gonugau huia iboin iboin. <sup>17</sup>Gonug gilana han nanalai uligeun. Go gilana nugau tabug 65 mita. Gonugau kabit sil go nanalai uligeun. <sup>18</sup>Go gilana aiwag baila wanib zaspasul patai memen. Ban uzan gol sil patai memen. Guzenaimai, uzan go iror awau sul milmilai dareun. <sup>19</sup>Ban uzan gonugau gilana bigeg aiwag gusig naliu asiu ata atai go sil patai memen.

Aiwag gusig amegai em ebuan dareu, go baila wanib zaspasul.

Aiwag ianai aliag inu, gonugau wanib sapaia.

Aiwag ianai ainarai em ausiau sul, gonugau wanib aget.

Aiwag ianai iwanarai karakun sul, gonugau wanib emeral.

<sup>20</sup>Aiwag ianai tabkuai epeua ausiau sul, gonugau wanib sadonikis.

Aiwag ianai was olig epeua, gonugau wanib konilian.

Aiwag ianai kwali baila ausiau sul, gonugau wanib krisolait.

Aiwag ianai gugen inu karakun ausiau sul, gonugau wanib beril.

Aiwag ianai sai naliu baila em sul, gonugau wanib topas.

Aiwag ianai houhou ausiau karakun sul, gonugau wanib krisopres.

Aiwag ianai nig basig epeua baila sul, gonugau wanib haiasin.

Aiwag ianai begurug gulin sul, gonugau wanib ametis.

<sup>21</sup>Go abuog begurug tutak tutak galoloi naliu begurug agal wanimag *pel*, go sil patai memen. Go ban uzanan abu gol sil abu ebu memen, iror sul milmileun.

<sup>22</sup>Iz ban uzan Uwait nugau Nou Zau banou piab tam, einen, Uwait gusig banou unum mui, Sipsip Nag mui agtal go uzanan Nou Zau banou sul.

<sup>23</sup>Ban uzan go am geil dual go hilai dab tam. Einen, Uwait nugau wanib al banou mui nug go ebu hilai dacaneu. Sipsip Nag go ebuan al. <sup>24</sup>Em ebuan duail el ag al go hilanau ebu ai damamen. Duail el agal gumaranemenin dudu banban agen agal ecesab naliupet pet oi heimai, go ban uzan oi alamam. <sup>25</sup>Ag go ban uzanan abuo g im i gebanem, go abuo g muzmuz im oitai damamen, einen, uzan go em i umutamau. <sup>26</sup>Duail el agen agal iweiu naliupet pet mui, agal ecesab aiwag banou sil gau macanemen mui, oimai, ban uzan oi alamam. <sup>27</sup>Bo, ecesab eg mui, duail el ag igul eg ipal aipag nuabun guzenanemen mui, duail el polu ze macanemen mui, ag petak pet, ban uzan i simamen. Duail el go Sipsip Nag nug gonugau awau dabun agau ebu agal wanimag sikut wai meun, go sag petak ban uzan simai damamen.

#### Awau dabun ban ze.

**22** <sup>1-2</sup>Tibur gonug iz awau dabun ban ze abai mileun. Ze go iror sul milmilaneun. Ze go go Uwait mui, Sipsip Nag dual goagal biz eiman alaimai, go ban uzanan abu ulaceiman noi beteun. Ze go gasag tubaim tubaim awau dabun a tapai darem. A go go wai tutak tutak ebu, geil tutak tutak a dab useg umkoskos macanemen. Go a agau agal salau agen duail el go ebeu ugarina, kasarabun. <sup>3</sup>Ece ipal getal Uwait nug eg marabun aneun, ag Uwait nugau ban uzan i uligaramamen. Bo, Uwait mui, Sipsip Nag agal biz petak ban uzan daba, Uwait nugau duail el ag gonugau wanib ulagwag muramamen. <sup>4</sup>Ag gonugau siameg pebi, gonugau wanib agal aipag ebu sikut wai maraba, damamen. <sup>5</sup>Umaum tub i damau. Al am dual go salau tamacag, einen, Uwait Ban nugtal agal al damau. Ag gumarabun duail el banban sul muzmuz damamen.

#### Yesus go koli alamau.

<sup>6</sup>Tibur gonug iz guzenai aileun, “Ze go na sikut wai memen petak pet, duail el ag go en agal oiagab petak abun iboin. Igual Ban, Uwait nug gonugau Ah Wes gonugau ze doimai, awaranemen dudu maraneu, go gonugau tibur agen gonugau salau dudu ein igul pigai zuabun abai marabun palautareun.”

<sup>7</sup>Yesus nug guzenai aneu, “Ag go don! Iz pigai alai. Agau e eiman Uwait nug ein igul ai u ses zuabun aneun, gonun, duail el inen ag agau e ebuan ze doimai, sesamoranemen agal oiagab naliu usalamau.”

<sup>8</sup>Iz Zon, izan ze go doimai, ece go unum han uligemin. Iz ze go doimai, ece uligaimai, tibur gonug ece go unum abai mileun, gonun, iz gonugau wanib ulagwag murabun gonugau arab waugab taubibemin. <sup>9</sup>Bo, gonug iz koli guzenai aileun, “Na igul go i guzenen. Iz na mui, nait zaunar, Uwait nugau ze doimai, awaranemen dudu abai, duail el unum ag ze e agau go ebu dareu sesamoranemen mui, agal salau zaiagar darem. Na Uwait tutak ulagwag moren.”

<sup>10</sup> Guzenaimai, gonug iz aileun, “Na igul e aiu ses zuabun ze agau e ebian nagtal i wageimai danen. Einen, ze e unum domen, go pigai zumau. <sup>11</sup> Duair in go igul eg macaneu, go igul eg go guzental mai damau. Duair in go wal igul eg macaneu, go wal igul go guzental mai damau. Duair in go igul naliu macaneu, go igul naliu go guzental mai damau. Duair in Uwait nug gonugau pet tapai meun, go unu tamacag, go guzental damau.”

<sup>12</sup> Yesu nug koli guzenai aneu, “Ag go don! Iz pigai alai! Ag duailen ein salau macanemen, iz agal ece ata atai salau go memen ebian ameg guzental oi alai. <sup>13</sup> Iz izasag amegai daremin, izasag ulis darem. Izasag amegai zomin du, izasag aiu ses zuabun du. Iz izasag bigegwa ecesab unum usalaremin, koli izasag salau go pocemin.

<sup>14</sup> Duailen inen ag agal tibur galau ze ulusamamen, ag oiagab siksikamamen. Ag ban uzanan gilan og simai, awau dabun a dab ban uzan go dareu ag zabun iboin. <sup>15</sup> Bo, duailen ag igul eg macanemen, ag ban uzan uzaneim damamen. Duailen go ag eten ze macanemen, duailen ag wal igul macanemen, duailen ag duailen ipal ugarina, noumanemen, duailen ag polu tibur ulapagwag maranemen, duailen ag polu ze maraimai, sesamoranemen, ag unum ban uzan uzaneim damamen.

<sup>16</sup> Iz Yesu, izan, izal tibur palautaremin, ag izal duailen ze e awaremen. Devit go iz eiman zoun, iz han gonugau ug eiman zomin. Izasag umaseuan ureb hilanau banou mui.”

<sup>17</sup> Ah Wes mui Sipsip Nag nugau air dual agen duailen tutak tutak awaramam, “Na alen.” Duailen inen ag ze go domenin agen han “Na alen!” amam. Duailen inen ag ze useg ugaraba, ag awau dabun ze zabun alan. Agal aiwag nug i gau mamau, gaul oi zimamen.

### **Zon nug gusig ze meun.**

<sup>18</sup> Iz Zon, izan, ag duailen igul go aiu ses zuabun en ze agau e ebu dareu domen gusig awarem, “Duailen inen ze go doimai, gonug gonugau dabeleu eim ze ipal ze go mui tulamau, Uwait nug han du go uhu eg pet agau enug aneun sul muramau. <sup>19</sup> Duair inug agau e ebian ze oi imau, Uwait nug han du go ece naliu murabun aneun ebian oi imau. Du go awau dabun a ebian a dab i zimau. Go Uwait nugau ban uzan agau gonug aneun sul simai i damau.”

<sup>20</sup> Du go nug ze go agau go ebu dareu unum aneun gonug eneu, “Petak pet, iz pigai alai!” Guzenina, iz go auremin, “Dubanou Ban, Yesu, petak, na alen!”

<sup>21</sup> Dubanou Ban, Yesu nug gonugau ougab naliu eiman Uwait nugau duailen unum isanaramau. Petak.